

Í niuucari ti jíme'en raxa í Jesús ti a'ín tiraataseírate a'íjna í Juan

Í niuucari ti jín ra'utéjche

¹ Ayee nu ne'íjna jín tiu'utaxájta ne'íjna jíme'e í niuucari í ti rú'avaataca'a í Dios jemi, ti ajta jíme'en raxa í Jesús ti ajta Círístu'u pú'een. Dios pu ayén raatá'a ti a'ín Círístu'u ajta hua'utaseírate'en a'ímej í mej ravaire'e mej mi ráamua'aree ti Dios ari ayén raaxí'epi'intare a'ij ti ca'anacan teja'uré'enejsin. Ajta a'ín Círístu'u, ayée pu a'íjna jín hua'utá'ixa a'íjna jíme'e ti seij a'uta'íteca'a ti jemin tí'ivaire'e í júte'e ti ij ayén raataseírate'en a'íjna í Juan.

² Nee nu niyen tejá'amua'ixaate'e ti ayén tí'ayajna a'íjna í niuucari ti Dios jemi é'eme'ecan, ti jíme'en raxa a'ij ti huaríj a'íjna í Jesús ti ajta Círístu'u pú'een.

³ Ché'e rutémua'ave'e a'íjna í ja'ati ti ayén huá'anamuajriste'e a'íjna i niuucari ti Dios jemi a'uvé'emej. Miché'e majta rutémua'ave'e a'íme í mej miyen ranamua, majta miyen rá'astijre'e a'ij ti té'eyu'usi'i a'íjna jetze, a'iné pu'uri tén teja'uré'enejsin.

Juan pu tihuá'ayu'use'e a'ímej í mej e'etiújse'iri ta'aráhua'apua teyuu

⁴ Neajta inee, i nej i'i Juan, ayée nu tejá'amuyau'use'e mi sej se'uun e'etiújse'iri

arahua'apuacié a'u ti huacá'a u Asia. Ché'e a'íin rí'i tejamuaatá'an, ajta amua'anpuá'ajte'en a'íjna ti jécua imuá seijre'eca'a, ti ajta íjii seijre'e, ti ajta ayén auj seíre'e a'ame tíj na'a rusén jime'e. Ché'e ayén che'atá na'a amuáaruuren a'íjna xiéjniu'ucare'ara'an ti a'uun é'eseijre'e a'u ti Dios á'ujca ipuari japua. A'íi pu aráhua'apua jín tí'ivaire'e.

⁵ Ché'e ajta a'íin rí'i tejamuaatá'an, ajta amua'anpuá'ajte'en a'íjna í Jesús ti ajta Ciríistu'u pú'een. A'íi pu caí ja'anáj tí'ti jín até'itza'ara a'íjna jime'e ti ayén te'anxájta í Dios jetze me'ecan. A'ii pu ajta a'íin pú'een í ti amuacaí a'itáaa huá'a tzajta'a a'ímej í mí'ichite. A'ii pu ajta a'íin pú'een ti tihuá'ajte'e naíjmi'ica í mej títetateí íiyen chaanaca japua. A'íi pu taxe'eve'e, ajta ruxuure'e jín tacá'ijxi í tej jín auteájturaa í Dios jemi.

⁶ A'íi pu ajta ayén taatá'a tej ti jamuan tiu'uta'aíjta, ajta tej ti teajta raatévaire'en te'íjna í Diojra'an, í ti ajta rájya'upua í Ciríistu'u. Tiché'e tiyen rí'i tiratá'acare'en tíj na'a rusén jime'e. Ché'e a'íin ajta nain jín tiu'uta'aíjta, tíj na'a ti yú auca'ití a'ame tíj na'a rusén jime'e.

⁷ Casi'i, xaaseíj, a'íi pu jaitiri jetze yé ve'ecánejsin. Naími'i mú raseijran matíj mena'a mej raajé'ica. Majta naími'i í huá'ateitestemua'a, matíj mena'a pua'amé íiyen seijre'e í chaanaca japua, a'íi mú ruyeínen me'íjna jime'e mej huataújxieemiste'esin matí'ij raaseíj.

⁸ Ayee pu tí'ixa a'íjna í tavástarala, ti ajta Dios pú'een ti seijre'e, ti ajta jécua imuá seijre'eca'a, ajta ti seíre'e a'ame tíj na'a rusén jime'e. Ayen

tijín: “Nee nu ne'ín pú'een í ta'amuájca, neajta, í netu'uve'eteájtí.”

Juan pu raasej í Ciríistu'u

⁹ Mi neajta inee, i nej i'í Juan, i nej á'amua'ihuaara'a pú'een, ayée nu che'atá nena'a a'amua jamuan rajpuaíjtzi ne'íjna jime'e nej Ciríistu'u jetze ajtémecan. Naími'i tu tiu'uta'aíjta Ciríistu'u jamuan. Teajta naími'i tu tiyen té'eviicua'í. A'uu nu á'ucatii a'ujna jaata'a ti e'eráahuachi ti ayén téja'arájtehuuaa tijín Patmos. A'uu nu aiteánami'ihuaca'a ne'íjna jime'e nej tihua'utá'ixaa ne'íjna jime'e í niuucari ti jín raxa í Dios, ti ajta a'íjna jín raxa a'ij ti huaríj a'íjna í Jesús.

¹⁰ Tí'ij ari a'ájna pítí'irijcaa matí'ij rana'amiche í tavástarara'a, a'ín xiéjniu'ucare'ara'an í Dios ayén rájve neetzi jemi. Netí'ij ni niyen ráanamujri'i u nehuárita'a ti ja'atí ca'anín jín naatajé. Ayee pu namuajre'eca'a tíj ti pua'a ja'atí ucáajijhua trompeeta jetze.

¹¹ Ayen tijín:

—Patá'aj hui ra'utéeyu'uxa í yu'uxari jetze a'ij pej tí'iseij. Pajta hua'uta'ítí huá'a jemi í mej arahua'apuacié e'etiújse'iri í Dios jemi, a'uun ti huacá'a u Asia. Tíj na'a a'ujna u Éfeso, ajta a'ujna u Esmirna, ajta a'ujna u Pérgamo, ajta a'ujna u Tiatira, ajta a'ujna u Sardis, ajta a'ujna u Filadelfia, ajta a'ujna u Laodicea.

¹² Netí'ij ni pí a'uré'eve nej ni raasej ne'íjna í ja'atí ti nejé'ejeeveca'a. Netí'ij niyen huaríj, ayée nu éeni'icí'e tiu'uséj ti'ítí ti japuan antitátzajmee, oro ti jín taavíjhuaca'a. Ayee pu pua'amé ará'aseca'a aráhua'apua í cantiira'a.

13 Ajta, a'úu pu já'ita'a a'íjna ti japuan antitátzajmee, seij pu a'uun huatéveeca'a ti ayén seijre'eca'a títj teví. Ayee pu éene'e te'ucáviijcaa cúxuri jime'e ti títj'íj, ajta puaasi pu jín avé'ejí'ici'ihuaca'a ti oro jín taavíjhua.

14 Cuaiínara'an pu huíjmu'ucaa, ajta cuaiínavi'ican pu cáci'puaca'a. Ayee pu seijre'eca'a títj cáne'a muxaj ti cuaiina, ti ajta seijre'e títj í seeri. Jé'ecan pu ajta ayén seijre'eca'a í jí'iseáara'an jetze títj tajj ti á'ataa.

15 Ajta, ayée pu seijre'eca'a í ñcájra'an jetze títj ti'iti ti cámejri'ihua, ti mesti. Naa pu ti'itemastájye'icaa títj cobre mej án yá'uxire í tajj tzajta'a. Ajta, títj a'ín tí'ixajta'a, ayée pu namuajre'eca'a títj játe'ana ti sihuájna ti huatámí'yeca'a.

16 A'íi pu ruri'irínta'a ru'ité'a'aca'a í rumuájca'a jetze, í xu'ura'ave í mej aráhua'apua ará'ase. Ajta a'ín í niucari ti jetzen aijnineica'a, ayée pu seijre'eca'a títj chun ti ruxí'ejta'a tejcamíimijme. Ajta ayée pu té'ataaca'a í ru jetze títj í xicaj ti nain jín airáxi'ixire.

17 Jíme'en nu'u raasej, aj nu ni e'erájve a'u ti e'era'íicajme. Cu xiee nej cu huámi'ini. Mi ajta a'ín, ruri'irínta'a jín í rumuájca'a na'ajtamuariej. Ayee pu tinaatá'ixaa títjín:

—Capej hui tí'itziñne'e. Nee nu ne'ín pú'een í nej amuájca, ajta nej uvé'eteajti.

18 'Nee nu ne'ín pú'een í nej i'irúuri. Nee nu huamí'i. Mi neajta, íjii, neajtahua'a nu i'irúuri títj na'a rusén jime'e. Neajta nu ne'íjna jín antínmua'aree nej ni raaxí'epí'intare'en mej huácui'ini na'ari mej ruuri muá'ara'ani, neajta

nej ni hua'iteáanan a'ujna a'u mej é'ecui'ini na'ari nej hua'irájtuaani ne'újna.

19 'Me'ecui xaa, patá'aj pe'íjna autéeyu'uxa í pej peri raasej, í ti íjii seijre'e, ajta í ti auj seijre'e, ajta ti auj ayén teja'uré'enejsin.

20 'A'ímej jime'e í xu'ura'ave í mej aráhua'apua ará'ase í pej hua'usej í nej hua'ité'a'acaa nerí'irínta'a pújme'en í nemuajca'a jetze, ajta a'íjna í ti aráhua'apua ti japuan antitátzajmee, ayée nu'uri timuaatá'ixaate'esin matij mena'a pua'amé rú'avaataca'a mú'etzi jemi. Me'íjna í xu'ura'ave í mej aráhua'apua ará'ase, a'ii mú a'ín pú'een í mej me'íjna jín antiújmua'aree mej mi huá'ucha'ín í mej e'etiújse'iri huá'a teyujta'a. Ajta, í ti aráhua'apua ti japuan antitátzajmee, a'ii mú me'ín pú'een í teite í mej arahua'apuacié e'etiújse'iri í mej rana'amiche í Dios.

2

I niuucari ti tihuá'ayu'use'e í ta'aráhua'apua teyuu: A'íme í mej Éfeso e'etiújse'iri

1 'Patá'aj piyen tiraata'íti'i pe'íjna í ti a'íjna jín antiújmua'aree ti huá'acha'í a'ímej í mej me'uun e'etiújse'iri u Éfeso ti jime'en yee: “Ayee pu ti'ixa a'íjna í ti hua'ité'a'acaa ruri'irínta'a a'ímej í xu'ura'ave í mej aráhua'apua ará'ase. Ayee pu ti'ixa a'íjna ti huá'a tzajta'a án é'eye'ive í ti oro jín taavíjhua, ti ajta antitátzajmee.

2 “Nee nu hui niyen tí'ijmua'aree a'ij sej titetiújcha'í, sej seajta temua'a naa té'eviicua'í. Seajta mú'een, caxu hua'ancuré'evi'itici a'ímej í mej a'ij pua'a titetiújcha'í sino ayée xu seri

huá'umua'areeri'i a'ímej í miyen rusej'rataca'a mej nu'u a'íin pú'een í ti Dios hua'antíhuau; mej nu'u tiu'utévaire'en tavástara'a jetze me'ecan. Mi majta a'íime, camu a'íin pú'een. Ayee mu'u ruhuá'itaca'a.

³ “Nee nu niyen tí'ijmua'aree sej raayí'iti sej te'utáviicua'i nain jime'e. Mú'een xu seajta rajpuaíjtzi xa'aye'i. Seajta mú'een, caxu raatéxiehuataca'a sej na'ará'astijre'e.

⁴ “Mi neajta inee, ayée nu tejá'amua'ixaate'e í sej jín auteájturaa ineetzi jemi. Xu'uri raatéxiehuataca'a sej siyen nexí'eve'e setí'ij amuacaí tí'inexe'eve'eca'a.

⁵ “Setá'aj siyen se'íjna jetze tiú'umua'ati a'ij sej éeni'ici'e mé núurie. Setá'aj siyen seicié tiú'umua'ati sej si siyen che'atá r'í'i titetiújcha'íi setí'ij amuacaí ríjcaa. Na'ari secaí siyen huárini, nee nu ne'uun mú'ejmi jemi e'etanéjsin nej ni amuá'ari'i a'íjna í ti antitátzajmee í ti ajta mú'ejmi jemi seijre'e. Ayee nu xaa rini ti pua'a secaí seicié tiú'umua'ati.

⁶ “Mi seajta mú'een, xí'epi'in xu rici a'íjna jime'e ti caí a'atzu amua'aráanajche a'ij mej ye'í rici a'íime í mej miyen hua'atamuá'amua tíjín: í mej ca'anéeri jín tí'ajta. Ayee pu che'atá caí tina'aráanajche ineetzi.

⁷ “Ajta a'íin í ti huiteájnámua, ché'e a'íin r'í'i tiráanamua a'ij ti a'íin xiéjniu'ucare'ara'an í Dios tíhuá'a'ixaate'e a'ímej í mej e'etiújsel'iri í Dios jemi. Ajta, a'íjna jime'e a'íjna í ja'ati ti tiu'umuá'itín, ayée nu raatá'asin ti a'íin ja'ati ayén ráacua'ani a'íjna jetze í ti seijre'e í c'íyej ti jín i'irúuri á'ara'ani, a'íjna í

ciyej í ti a'uun e'etávee a'u mej a'utaújtemua'ave'en jemin í Dios.”

I mej Esmirna e'etiújse'iri

⁸ 'Patá'aj pajta piyen tiraata'íti'i pe'íjna í ti a'íjna jín antiújmua'aree ti huá'acha'íí a'ímej í mej me'uun e'etiújse'iri u Esmirna ti jíme'en yee: “Aye pu ti'ixa a'íjna í ti a'íin pú'een í ta'amuájca, ajta í ti a'íin pú'een í tu'uvé'eteajti, a'íjna í ti huam'íi, ti ajta ajtahua'a huatarúj.

⁹ “Nee nu niyen tí'ijmua'aree í sej jín rajpuaíjtzi, seajta mú'een, secaí a'ij tí'ijviicua'i. Mí seajta mú'een, neetzi jemi xu chújteaani pú'een temua'a jeíhua. Nee nu neajta ramua'aree mej jeíhua huáp'i'í tí'ihua'itaca a'íime í mej miyen ruseíjrataca mej nu'u me'íjna jetze ajtém'e'ecan í Israél. Mí ajta, capu ayén ti'ayajna sino a'íí mú' jemin e'etiújse'iri í Satanás.

¹⁰ “Caxu rázziine'e í sej rajpuaíitzi xá'aju'un. Casi'i, a'íjna í tiyaaru'u, a'íí pu a'uun amua'utétuaasin seica jamuan a'u mej títejé'enaamuaca. Aye pu a'íjna jín á'amuaruuren mej mi amuaatéeseij ti pua'a siyen tiná'astijre'e nusu secaí. Aye xu pua'an xicaj rajpuaíitzi xá'aju'un a'achú cumu tamuáamuata'a xicaj. Ti pua'a siyen nain jín te'utáviicua'i ineetzi jemi, seajta caí a'ij sena'a ti pua'a miyen amuaacui'ini, nee nu ne'íjna amuaatá'asin ne'íjna í curuun í sej jín i'irúuri xá'aju'un tíj na'a rusén jime'e.

¹¹ “Ajta a'íin í ti huíteájnamua, ché'e a'íin rí'í tiráanamua a'ij ti a'íin xiéjniu'ucare'ara'an í Dios tihúa'a'ixaate'e a'ímej í mej e'etiújse'iri í Dios jemi.

Ajta, a'íjna í ja'atí ti tiu'umuá'itín, capu a'atzu raci'ítí ti a'ín ayén che'atá rajpua'ítzi á'ara'ani matíj a'íime í mej yá'ujsin í rux'éjniu'uca í ti auj ruurica'a.”

I mej Pérgamo e'etiújse'iri

12 'Patá'aj pajta piyen tiraata'ítí'i pe'íjna í ti a'íjna jín antiújmua'aree ti huá'acha'íi a'ímej í mej me'uun e'etiújse'iri u Pérgamo ti jíme'en yee: “Ayee pu ti'ixa a'íjna í ti ru'itéechui í chun í ti rux'íejta'a tejcámíimijme.

13 “Nee nu hui ramua'aree a'u sej a'uchéjme, a'ujna a'u ti tejé'ajta a'íjna í Satanás. Mi seajta mú'een, seúche'e xu ná'astijre'e ineetzi. Caxu raatéxíeehuataca'a sej ná'atzaahuate'e ineetzi se'ájna xicáara'a ti jetzen seijre'eca'a a'íjna í Antipas teecan, a'íjna ti ayén huataújsejrataca'a ti a'ín neetzi jetze me'ecan tí'ivaire'eca'a. Capu ti'ítí jín auteájturaa ineetzi jemi a'íjna í ja'atí. Mi majta, a'íi mú'raajé'ica mú'ejmi tzajta'a, me'újna a'u ti tejé'ajta a'íjna í Satanás.

14 “Mi seajta mú'een, ti'ítí xu jín auteájturaa ineetzi jemi. A'uu mú'éseijre'e mú'ejmi jemi seica í mej miyen tirá'astijre'e me'íjna í niuucari í mej jín miyen che'atá tihuá'amua'ate tíj ajta a'ín Balaam teecan tiraamuá'ate a'íjna í Balac teecan ti ayén hua'ítzi jín hua'utémuá'itín a'ímej í mej Israel jetze ajtéme'ecantaca'a, mej mi miyen ráacua'ani me'íjna í hua'ira'a í mej ráamuai'ivajtaca'a a'ímej jemi í mej caí dios pú'een, ajta mej tiú'uxana'acire'e.

15 “Ayee mú'che'atá mena'a seijre'e mú'ejmi jemi seica í mej miyen majta rá'astijre'e í

hua'aye'ira a'ímej í mej ca'anéeri jín tí'ajta, í mej jee nicolaitas. Mi seajta mú'een, ayée xu seuj hua'atá'aca mej me'uun é'eseijre'e.

16 “A'íj nu jín, niyen tejá'amua'ixaate'e yee setá'aj seicié tiú'umua'ati. Na'ari secaí siyen huárini, nee nu mú'ejmi jemi e'etanéjsin, nej ni hua'uténe'usi'ite'en a'ímej a'íjna jime'e nej niyen tiu'uta'ajta sej ca'anéeri jín hua'utamúárite'en.

17 “Ajta a'íin ti huíteájnamua, ché'e a'íin temua'a naa tiráanamua a'ij ti a'íin xiéjniu'ucare'ara'an í Dios tihuá'a'ixaate'e a'ímej í mej e'etiújse'iri í Dios jemi. Ajta a'íin í ti tiu'umuá'itín, ayée nu raata-puaíjve'esin a'íjna í cua'ira ti júte'e é'aviitzi'i. Neajta nu tetej raatátistejsin ti cuaínara'a. Ajta a'íjna jetze í tetej, jéjcuacan jín pu té'eyu'usi'i a'ij ti ari ántehuaa a'íjna í ja'ati. Ajta capu mé'e ja'ati ayén ramua'aree a'ij ti té'eyu'usi'i sino a'íi pu'u í ja'ati ramua'aree í nej raatátistejsin ne'íjna í tetej.”

I mej Tiatira e'etiújse'iri

18 'Patá'aj pajta piyen tiraata'ítii pe'íjna í ti a'íjna jín antiújmua'aree ti huá'acha'íi a'ímej í mej me'uun e'etiújse'iri u Tiatira ti jíme'en yee: “Ayee pu yee ti'ixa a'íjna ti yaujra'an pú'een í Dios, ti ajta ayén éene'en aj j'isijmee tíj taij ti atiújmeme, ti ajta ayén éene'en ti'ícajme tíj cobre ti'ítii í mej tiracámeijri'i.

19 “Nee nu ramua'aree a'ij sej titetiújcha'íi. Mú'een xu hui siyen ruxe'eve'e seij seajta seij. Seajta, siyen ruxí'evi'ira'a jín tí'ivaire'e. Seajta té'eviicua'i temua'a naa. Seajta íjii, jaítze'e xu r'íi titetiújcha'íi secaí sejm'íi.

20 “Mi ajta, a'ñi pu caí na'aránanajche a'ij sej rici. Mú'een xu ratá'aca ti a'ñin 'íita'a ayén a'utéveeca mú'ejmi jemi, a'íjna í 'íita'a ti ayén ántehuaa tijín Jezabel. Ayee pu rusejrata ti Dios jetze me'ecan tí'ixaxa'a. Mi ajta, capu a'ñin pú'een a'iné a'ñi pu ayén hua'itzi jín ti-huá'amua'ate mej mi tí'ihuaújxana'acira'aten mej mi majta miyen ráacua'ani me'íjna í hua'ira'a í mej ráamuai'ivajtaca'a a'ímej jemi í mej caí dios pú'een.

21 “Nu'uri á'atee nej raatá'a ti seicié tiú'umua'ati. Mi ajta a'ñin, capu a'atzu á'ujca'ane ti ayén seicié huárini a'íjna jime'e ti tí'ixana'acire'e.

22 “Me'ecui xaa, ayée nu án ye'erájin sin utaatzi japua a'u mej é'ecu'ucutzu í mej tí'icucui'i. Majta a'íime í mej jemin tí'ixana'acire'en, ayée nu jeíhua huápi'i puaíjtzi hua'utá'asin ti pua'a mecaí raatéxieehuata mej miyen a'ij pua'a rici tíj ajta a'íjna.

23 “Neajta nu huá'acui'ini ne'ímej í yaújmuame'en a'íjna í 'íita'a. Majta naími'i, a'achú mej pua'amé e'etiújse'iri í Dios jemi, a'ñi mú ramua'aréeren nej ne'ín pú'een í ti rú'umua'aree a'ij ti tirá'amitiejte'e sejí í rumua'atzíira'a jetze, ajta a'ij ti té'umua'atze í ru tzajta'a. Neajta, ayée nu amuaatá'asin sejí neajta sejí a'ij ti ayén tiraavíjte'e a'íjna jime'e a'ij ti sejí tí'itiújcha'íica'a.

24-25 “Sej seajta mú'een, mi seica, mi sej se'uun Tiatira é'eche, mi sej seajta caí siyen tirá'astijre'e se'íjna í niuucari ti hua'itzi pú'een, caxu se'íjna ri'iree í mej jee jeíhua huápi'i ruxe'eve'e í Sathanás jemi. A'íj nu jín, canu máa a'ij tí'itíj jín tejá'amua'íjcate'e sino setá'aj siyen huárini sej seuj

rá'astijre'e a'ij sej seri tíraarí'ire. Setá'aj siyen huárini asta nena'a caí neajtahua'a yé uv'éenen.

26 “Ajta a'ín ti tiu'umuá'itin, ti ajta ayén che'atá na'a rí'i tí'itiújcha'íi netíj inee, ajta na'a caí nain te'entipúa'are, nee nu ne'íjna jín tí'ira'íjcate'en ti ij a'ín tíhua'uta'aíjte'en a'ímej í mej seíj chuéjra'a japua a'uchéjme.

27 “Ca'anéri pu jín tihua'a'aíite'e a'ame. Ayee pu che'atá na'a tihua'antipúa'ajte'esin a'ímej í mej rájcha'íire'e tíj ja'ati ayén tiraatéaaraxi'in í xa'ari ti xarij jín taavíjhua. Ayee nu che'atá nena'a tí'iti jín tí'ira'íjcate'en tíj ajta a'ín niyá'upua ayén tí'iti jín tinaa'íjca.

28 “Neajta niyen huateáturan í jemin ti ij a'ín ayén tátzave'e á'ara'ani tíj a'íjna í xu'ura'ave ti a'íjninei tapúa'arijme'eca.

29 “Ajta a'ín ti huíteájnamua, ché'e a'ín ja'ati temua'a naa tiráanamua a'ij ti a'ín xiéjniu'ucare'ara'an í Dios ayén tíhua'a'ixaate'e a'ímej í mej e'tiújse'iri í Dios jemi.”

3

Í mej Sardis e'etiújse'iri

1 'Patá'aj piyen tiraata'íti'i pe'íjna ti a'íjna jín antiújmua'aree ti huá'acha'íi a'ímej í mej me'uun e'etiújse'iri u Sardis ti jíme'en yee: “Ayee pu tí'ixa a'íjna ti jemin seijre'e í xiéjniu'ucare'ara'an í Dios ti arahua'apuáca jín tí'imuari'e. Nee nu neajta ru'ité'aa í xu'ura'ave í mej aráhua'apua ará'ase. Ayee nu niyen tí'ijmua'aree í sej jín tí'imuari'e. Ayee mú tí'ixaxa'a sej nu'u ruuri se'íjna jíme'e sej

jeíhua tí'imuari'e. Mi seajta mú'een, neetzi jemi xu siyen mi'ichi.

² “Setá'aj atanéjne'ere, setá'aj seajta rí'i ráaruuren se'íjna ti auj mú'ejmi jemi seijre'e, ti ajta ari tímua'a mi'ini, a'iné ayée pu tiná'amitíejte'e ineetzi sej caí ti'itij jín araúrate í Dios jemi.

³ “Setá'aj siyen ra'utamua'aree í sej ra'ancuré'a, í sej seajta ráanamujri'i. Setá'aj se'íjna jín araúraten, seajta seicíé tiú'umua'ati. Ti pua'a secaí siyen atanéjne'ere, nee nu mú a'uvé'eméle na'ame mú'ejmi jemi tíj nahua'ari. Seajta mú'een, caxu ramua'aréeren a'atzaj nej pua'a ne'uun e'etanéjsin mú'ejmi jemi.

⁴ “Mi majta, seica mú mú'ejmi jemi seijre'e í mej caí miyen ti'iti jín tite'á'atura í ru jetze. A'íi mú á'ujujhua'ane'e muá'aju'u ineetzi jamuan, majta á'ujujhua'ane'e muá'aju'u mej cuaiínavi'in tiu'uchén, a'iné ayée pu tihua'uvíjte'e a'ímej.

⁵ “A'íjna í ti tí'imua'itín, ayée pu hui léene'e ti'itechée a'ame cuaiínavi'ican. Neajta inee, canu ra'uré'uuna í ti jín ántehuaa í yu'uxari jetze í mej jetzen á'ayu'usi'í a'ímej í mej rusén jín huateáturaasin í Dios jemi, sino nee nu neajta niyen tiraataxáta í ti jín ántehuaa jemin í niyá'upua, neajta huá'a jemi í mej jemin tí'ivaire'e í niyá'upua.

⁶ “Ajta a'ín í ti huiteájnammua, ché'e a'ín ja'ati temua'a tiráanamua a'ij ti tihuá'a'ixaate'e í xiéjniu'ucare'ara'an í Dios a'ímej í mej e'etiújse'íri jemin í Dios.”

I mej Filadelfia e'etiújse'íri

⁷ Patá'aj pajta tiraata'ít'i pe'íjna í ti a'íjna jín antiújmua'aree ti huá'acha'íi a'ímej í mej me'uun

e'etiújse'iri u Filadelfia ti jíme'en yee: “Patá'aj piyen ti jíme'en yee, ayée pu ti'ixa a'íjna í Dios í ti r'íi tirájcha'ií, a'íjna í ti ajta tzáahuati'ira'a jín tí'ixaxa'a. A'íi pu yee ajta a'íjna jín antiújmua'aree ti hua'atá'aca mej mi me'uun a'uteárute a'u ti e'irájca a'íjna í ti jetzen huanéj í David teecan. Ti pua'a a'íin te'antácuuna, capu ri'irí ti ja'ati te'iteáanan. Ajta, ti pua'a a'íin te'iteáanan, capu ajta ri'irí ti ja'ati te'antácuuna.

8 “Nee nu ramua'aree a'ij sej rici. Casi'i, xaaseíj. Nu'uri niyen amuaatá'a sej si siyen ruxiéehua se'uun a'uteárute. Ajta, capu ri'irí ti ja'ati amuaatá'ijmi. Nee nu ramua'aree ti caí jeíhua amú'uca'anisti'i. Mi seajta mú'een, seúche'e xu ra'ará'astijre'e a'ij nej tejamuá'ixaa. Caxu seajta nexiéehua.

9 “Me'ecui xaa, ayée nu huá'aruuren ne'ímej í mej miyen ruseijrata mej nu'u Israél jetze ajtéme'ecan. Camu xaa ne'u a'íjna jetze ajtéme'ecan sino metí'ihua'itaca mu'u. A'íi mú jemin e'etiújse'iri í Satanás. Ayee nu ca'anéeri jín huá'aruuren mej mi mú a'uvé'eju'un mej títunutaxi'ín mú'ejmi jemi mej mi majta ráamua'aree nej já'amuaxe'eve'e.

10 “A'iné mú'een xu siyen ra'ará'astijre'e a'ij nej neri tejámuaa'íjca, sej siyen che'atá sena'a te'utáviicua'i netíj neajta inee te'utáviicua'iri'i, ayée nu r'íi tejá'amuacha'íi ti ij caí ayén tejamuá'aci'iti a'ájna mej jetzen miyen á'aviicua'ire'e muá'aju'u, a'íjna xicáara'a tí'ij ayén teja'uré'enejsin tí'ij huá'a japua rájveti naíjmi'ica í mej íiyen huachéjme í chaanaca japua. Mi'i mú a'uvé'eju'un

mej títunutaxi'in mú'ejmi jemi mej mi majta ráamua'aree nej já'amuaaxe'eve'e.

11 “Mu nu e'icáame inee ca'anacan. Rí'i xu'u, setá'aj siyen huárini setá'aj rí'i tirájcha'íi xá'ara'ani í sej seri tí'ijcha'íi í Dios jemi. Caxu raatá'acare'en ti ja'ati á'amuanahua'ira í curuun í sej seri raatéemua'iti.

12 “Ajta a'ín ti tiu'umuá'itín, ayée nu ti'itij jín tiraata'íjcate'esin tí'ij ti'itevéé a'ame u téyujra'an í neDioj. A'íi pu a'uun a'uracaíi a'ame tíj na'a rusén jime'e. Neajta nu ra'acáchajtza ne'íjna jetze í ti jín ántehuaa í neDioj, neajta í ti jín téja'arájtehuaa chajta'ara'an í neDioj, a'ujna u Jerusalén í ti jéjcuu, í ti ajta a'uun e'icaanej u ta japua a'u ti é'eseijre'e í neDioj. Neajta nu niyen jetzen ra'acáchajtza í nej jéjcuacan jín ántehuaa.

13 “Ajta a'ín ja'ati ti huiteájnamua, ché'e temua'a naa tiráanamua a'ij ti a'ín xiéjniu'ucare'ara'an í Dios ayén tihuá'a'ixaate'e a'ímej í mej e'etiújse'iri í Dios jemi.”

I mej Laodicea e'etiújse'iri

14 'Patá'aj pajta piyen tiraata'íti'i pe'íjna í ti a'íjna jín antiújmua'aree ti huá'acha'íi a'ímej í mej me'uun e'etiújse'iri u Laodicea. Piyen ti jime'en yee: “Ayee pu ti'ixa a'íjna ti ayén tzáahuati'ira'a jín tí'ixaxa'a tíjín: Ayen ti'ayajna, a'íjna ti ajta tzáahuati'ira'a jín a'ij ti'ixa Dios jime'e. Ajta capu ayén tí'ihua'itaca. A'íi pu ajta a'ín pú'een í ti Dios jamuan tiú'utaahuaca'a tíj na'a ti tí'iseijre'e íjii.

15 “Nee nu ramua'aree a'ij sej titetiújcha'íi. Caxu a'ujca'anéecan jín na'ancuré'evi'iti ineetzi. Caxu seajta ca'anéeri jín naatamuári, sino chá'ana'a

xu'u siyen titetiújcha'ii. Ayee pu tina'aráanajche sej a'ujca'anéecan jín na'ancuré'evi'itín na'ari ca'anéeri jín sej naatamuárite'en.

16 “Ayee xu tí'ivaire'e tíj jaj ti cáj na'a tí'ipisti. Caxu siyen tí'ivaire'e tíj jaj ti jeíhua písti nusu ti jeíhua cimujra. A'íj nu jín niyen á'amuaruuren tíj ja'ati ti ayén jaj aítzitzee ti caí xí'epi'in rá'amencate'e. Nee nu ca'anéeri jín mé amúuhua'axijsin.

17 “Ayee xu tí'ixaxa'a yee sej seri chíjteaani sej pú'een, ti yee jeíhua huápi'i rí'i tejamuáavai, ti yee caí tí'iti tejamuá'aturaate'e. Mi seajta mú'een, caxu siyen tí'ijmua'aree sej xána'avisí'i, seajta siyen a'ij pua'a huá'aseijrate'e huá'a jemi í teite. Mú'een xu xaa caí a'ij tí'ijviicua'i, seajta aracúcu'unijmee, seajta siyen muámua'avijmé'e.

18 “A'íj nu jín, niyen tejá'amuahavii sej si neetzi jemi ráananan se'íjna í oro ti taij jetze rutá'ahuaca sej si siyen huateújchijteaanita. Setá'aj siyen neetzi jemi ráananan í cáxuri ti naa tí'icuaína sej si se'íjna jín ucaújchejte'axi'in ti ij caí ayén seijre'e í sej jín tí'itevi'ira'a se'íjna jime'e sej muámua'avijmé'e. Setá'aj seajta neetzi jemi ráananan se'íjna í tí'iti í sej arájhuaate'en í rují'i jetze tí'ij rí'iriistan sej tí'iti huasej.

19 “Ayee nu hua'ajteá'axi'ica'a, neajta puaíjtzi hua'atá'aca a'ímej í nej huá'axe'eve'e. A'íj pu jín, setá'aj seicéé tiú'umua'ati, seajta a'ujca'anéecan jín na'ará'astijre'en.

20 “Me'ecui xaa, nee nu a'itéjvee tá'apueerta, nete'ejteáatu'axa. Tí pua'a ja'ati ayén náanamua nej

rájee, ti pua'a a'ñin ajta tina'antácuune'en, aj nu ni jemin uteáruti tej ti naími'i tiú'ucua'ani tajñmua'a.

²¹ “Ajta a'ñin í ti tiu'umuá'itín, ayée nu raatá'asin ti ne jamuan a'ujyeíjxi'ín a'u nej tejé'ajta a'iné ayée pu tináaruu ineetzi. Netí'ij tiu'utéemua'iti, aj nu ni án niyá'upua jamuan a'ujyeíjxi a'u ti a'ñin tejé'ajta.

²² “Ajta a'ñin í ja'ati ti huiteájnámua, ché'e temua'a naa tiráanamua a'ij ti a'ñin xiéjniu'ucare'ara'an í Dios ayén tihuá'a'ixaate'e a'ímej í mej e'etiújse'iri í Dios jemi.”

4

A'ñi mú raná'amiche'e u ta japua

¹ Tí'ij raatapuá'ajtaca'a ti tiu'uxájtaca'a, aj nu ni niyen éeni'ici'e tiu'uséij. Seíj nu huaseíj í puéerta ti antacúuni'ihuaca'a u ta japua. Ajta a'ñin í nej amuacaícan ráanamujri'i, ajtahua'a pu tí'ine'ixaate'eca'a. Ayee pu namuajre'eca'a tíj ja'ati ti ucáajjhua trompeeta jetze. Ayen tijín:

—Yen vejnéechi nej ni tímuaataseíjrate'en a'ij ti tiú'ujxe'eve'e ti ayén teja'uré'enen méjca'i huáyee.

² Jíme'en pu'u ayén tiu'utaxájtaca'a, aj pu a'ñin xiéjniu'ucare'ara'an í Dios, a'ñi pu neetzi jemi ru'uté'aa. Ayee nu éene'en tiu'uséij cumu a'u ti ípuari a'utéjvee u ta japua. Ajta a'íjna japua í ípuari, ja'ati pu jetzen acájca.

³ Ajta a'ñin ti jetzen acájca, ayée pu naa éene'en tí'itéechen. Ayee pu seijre'eca'a tíj tetej ti huápi'i tí'ijnajche, ti pa'u í tetej, ajta ti teúumua ajta í ti ranaxca. Ajta ayén seijre'eca'a tíj í seij í tetej í ti pa'u ti ajta naa tí'imesti. Cu'uxaí pu ajta ataviíjca'a

a'u ti a'utéveeca'a í ipuari. Ayee pu rú'aaravi'i seijre'eca'a tíj a'íjna í tetej mej miyen ratamuá'amua tíjn esmeralda.

⁴ Ajta, seica í ipuari atavéejme'ecaa a'u ti a'utéjvee a'íjna í ipuari. Seité japuan muáacua pu ará'aseca'a a'íjna í ipuari. Majta me'ín í vaujsi, a'íi mú acaté'etejme'ecaa jetzen í seica í ipuari. Majta miyen seité japuan muáacua ará'aseca'a a'íime í vaujsi. Majta cuaiínavi'ín mú ti'itéchejca'a, majta curuun te'utearújte'emé'e ti oro jín taavíjhuaca'a.

⁵ A'ájna seij japua í ipuari miyen témaxcava'ara'a, majta téniuuca'a. Ajta, án ti e'evé'evee í ipuari, tatzari pu a'atáatime'ecaa ti ayén pua'amé aráhua'apua. Ajta a'ín í tatzari, a'ii pu a'ín pú'een í xiéjniu'ucare'ara'an í Dios ti aráhua'apua jín tí'imuari'e.

⁶ Ajta a'ujna a'u ti e'evé'evee, ayée pu éene'e huámuan á chuaata'a a'íjna jime'e ti naa tí'imesti, ti ajta tí'itatjaz. Ayee pu seijre'eca'a tíj a'íjna í tetej mej miyen ratamuá'amua tíjn cristal.

Majta a'íime í mej muáacua ará'ase í mej ruuri, a'úu mú uhua'ú'upu'ujme'ecaa tíj na'a ti'ípua'amé í ipuari. Tí'ij pí na'a mú tí'iseij, nain japua, tíj na'a júte'imua, ajta íiyen chaanaca japua.

⁷ Ajta a'ín í ti seíti, ayée pu araseijre'e tíj muajye. Ajta í ti hua'apua, ayée pu araseijre'e tíj puuya. Ajta a'ín ti ruuri ti hua'íca, ayée pu te'ecánee tíj teáata'a, ajta a'ín í ti muáacua, ayée pu seijre'eca'a tíj cua'íra'ave ti rá'ara'ive.

⁸ Majta a'íime í mej muáacua, í mej majta i'í ruuri, a'íi mú arajsev'íca ajtá'anájmee. Tí'ij pí na'a mú tí'iseij nainjapua tíj na'a júte'imua, majta íiyen chaanaca japua. Nain tújca'ari tzajta'a, majta nain

tíca'ari tzajta'a, a'íí mú jemin tí'ichuicaca'a í Dios.
Camu ja'anáj raatapuá'ajta mej miyen ti'ichuíca
tíjín:

Rí'í pu tí'iseijre'e, temua'a pu urarí'ene'acan jín
seijre'e,

xí'epi'ín pu een seijre'e tíj na'a rusén jime'e í
tavástara'a,

a'íjna í Dios ti nain jín antiújmua'aree,

a'íjna í ti ruseíj seijre'eca'a, ti ajta seijre'e íjii,
ti ajta seíire'e a'ame tíj na'a rusén jime'e.

⁹ Majta miyen rí'í tiratá'aca, majta
raná'amiche'e, a'íí mú majta tí'ijteujtzi'ire'e
muá'aye'i me'íjna ti a'íín ipuari jetze acájca, ti
ajta ruuri tíj na'a rusén jime'e.

¹⁰ Matíj mena'a miyen ríci í mej muáacua, í mej
majta ruuri, a'íí mú majta miyen ríci a'ííme í mej
vaujsi í mej seité japuan muáacua ará'ase. A'íí mú
aicaújtuxíjsin me'íjna jemi í ti ipuari jetze acájca,
mej mi raateánajche me'íjna ti i'í ruuri tíj na'a rusén
jime'e, majta raatátuiire'esin í jemin í tiu'ujcúrun.
Majta miyen ti'ichuíca tíjín:

¹¹ Ayee pu timuaavíjte'e mú'etzi,

mi pej tavástara'a pú'een, mi pej pajta i'í Dios.

Tej ti tiyen rí'í timuaatá'an,

tej ti tiyen muaná'amiche'en.

Pej pi nain jín antí'amua'aréere,

a'iné mú'ee pej nain tiú'utaahuaca'a,

nain í ti seijre'e íjii.

Ayee mú 'een jín huataseíjre me'íjna jime'e pej
piyen tira'utéeca'ane á'axe'evi'ira'a jime'e.

A'íj mú jín miyen huátaavijhuaca'a.

5

I ti jíri'i ti jetzen té'eyu'usi'i, ajta í Cáne'a

¹ Netí'ij ni ayén éene'en tiu'uséij, ti a'íjna í ti acájca í ipuari jetze, ruri'iríinta'a pu ru'itépijaa í yu'uxari í ti ruxí'ejta'a té'esiimua'ihuaca'a, ajta, á'avijti'ihuaca'a arahua'apuáca jime'e í xijca.

² Neajta ja'ati huaseíj ti júte'e tí'ivaire'e. A'íjna í ja'ati jé'ecan pu huápi'i uráca'anée. Ca'anín pu jín tiu'utáhuau. Aye pu tijín:

—¿A'ataani ayén huataújci'ipua ti a'ín ra'ajsiújtza'anaxi'ín í ti jín á'avi'ijti'ihuajmee, ajta í ti raatáxijta í yu'uxari? —Aye pu tiu'utaxájtaca'a.

³ Ti'iquí ayén te'irájraa. Tij na'a a'ujna já'ahua'a u júte'e, ajta íyeyen chaanaca japua, ajta u tajete, capu mé'e ja'ati ti ayén tiu'utaúci'ipua í ti ayén tiraatáxijta, ajta ti ra'useíj a'íj ti té'eyu'usi'ihuaca'a.

⁴ Neajta inee, jeíhua nu huápi'i neyeineca'a ne'íjna jime'e mej caí rateuve'eca'a seíj ti ayén tiu'utaúci'ipua í ti ayén tiraatáxijta í yu'uxari nusu ti ra'useíj, ajta ti ra'ujjve'en.

⁵ Ti'iquí seij ti huá'a jetze ajtéme'ecantaca'a a'ímej í vaujsi, ayée pu tinaatá'ixaa tijín:

—Capej ayeine. Me'ecui xaa, a'íjna mej miyen ratamuá'amua tijín í Muajye í ti huá'a jetze ajtéme'ecan a'ímej í mej Israel jetze airáne, a'íjna í mej majta miyen ratamuá'amua tijín A'íjna í ti David jetze airaújneijte, a'í pu ari tiu'utéemua'iti tí'ij a'ín ayén tira'ajsiújtza'anaxi'ín í ta'aráhua'apuáca jín á'avi'ijti'ihuajmee, ti ajta raatáxijta.

⁶ Neajta niyen éene'en tiu'uséij tǵ ti'titi í Cáne'a, ayée seijre'eca'a tǵ í mej meri raajé'ica. A'uu pu a'utéveeca'a jemin í ipuari. A'íi pu ajta huá'a tza-jta'a seijre'eca'a í mej muáacua í mej ruuri, majta a'ímej í mej aitecaijme'ecaa a'íime í vaujsi.

Ajta a'íjna í Cáne'a, arahua'apuáca pu ájta'ehuájme'ecaa, ajta arahua'apuájmé'en pu ájji'isijme'ecaa. Ajta a'íin jǵiseáara'an í ta'aráhua'apua, a'ii pu a'íin pú'een í xiéjniu'ucare'ara'an í Dios í ti nainjapua u ya'uta'íteca'a íiyen chaanaca japua.

⁷ Ajta a'íin í Cáne'a, a'úu pu a'uvé'emej a'íjna jemi í ti e'ecájca í ipuari jetze. Tǵ'iquí ra'ancuré'epi a'íjna í yu'uxari í ti ri'irínta'a seijre'eca'a a'íjna í ti ipuari jetze acájca.

⁸ Tǵ'ij ra'ancuré'epi a'íjna í yu'uxari, a'íime í mej muáacua í mej ruuri, majta a'íime í vaujsi í mej seité japuan muáacua ará'ase, a'íi mú miyen a'ímuá aicaújtuuxi me'íjna jemi í Cáne'a. Matǵ mena'a pua'amé te'ité'í'ica'a me'íjna í aarpa, majta tuxa'a ti oro jǵn tí'itaavijhuaca'a. Cuaane'e pu avé'ejistǵjme'ecaa a'íjna jetze í tuxa'a. Ajta a'íjna í cuaane'e, a'ii pu a'íin pú'een í mej raatáhuaviiri'í í Dios a'íime í mej rǵ'í tí'iteseijre'e í Dios jemi.

⁹ Matǵ'ij mi miyen jéjcuacan jǵn tiu'utáchuiicaca'a tǵjǵn:

Ayee pu tiraavǵjte'e pej mú'ee piyen ra'ancuré'epin, pajta raatáxijta a'íiné memuaajé'ica.

Pajta mú'ee, pepu'uri tiu'utanájchitaca'a pe'íjna jime'e í á'axuure'e í mej jǵn té'echa'íca'a í Dios jemi,

pej pi tiu'utátuiire'en í Dios jemi í teite
mej nainjapua é'eme'ecan.

A'íí mú huá'a jetze ajtémecan matíj mena'a
seíj jetze mej airaújnejte

nusu a'achú pua'amé í mej seíj niuucari jín
tí'ixaxa'a

nusu matíj mena'a pua'amé
í mej teitestemua'ame'en pú'een.

A'u ti na'a mej é'eseijre'e seíj japua í chuej,
a'úu mú é'eme'ecan.

¹⁰ Pajta mú'ee, pepu'uri piyen r'íi huá'uruu
mej mi miyen me'ín teitestemua'ame'en
pú'eene'en muá'ara'ani a'íjna í ti tí'ajta,
mej mi majta ti'itij jín tiu'utévaire'en
me'íjna jemi í Dios.

Mí majta a'íime, a'íí mú tiu'uta'ájta
íiyen chaanaca japua.

Ayee mú tiu'utáchuiicaca'a.

¹¹ Netí'ij ni atáneereca'a. Netí'ij ni
huá'unamuajri'i a'íimej í mej u ta japua tí'ivaire'e.
Mé mu'icáa huápi'i. Capu a'atzu r'íirí ti
hua'uté'itien, ni capu ámitieere'e a'achú mej
pua'amé. Ayee mú pua'amé matíj í xu'ura'ave.
A'íí mú me'uun atavéjme'ecaa me'íjna jetze í
ípuari, majta a'íimej jetze í mej muáacua í mej
ruuri, majta a'íimej jetze í vaujsi.

¹² A'íí mú miyen ca'anín jín tiu'utáchuiicaca'a
tijín:

Tiché'e tiyen r'íi tiraatá'an te'íjna í Cáne'a
í mej raajé'ica.

Jee xaa, ayée pu tiraavíjte'e ti a'íin ayén
tira'ancuré'an a'íjna ti Dios jín tira'íjcate'e,
ajta tíj na'a ti jemin tí'iseijre'e í Dios,

ajta í mua'atzíira'a í ti jín tiu'uta'aíjta,
 ajta í muári'eri'ire'ara'an í ti jín nain jín
 tiu'utémua'itín.
 Tiché'e rí'í tiraatá'an, teajta ahuátatzaahuate'en
 te'íjna jemi,
 tiché'e teajta huátatemua'ave'en
 te'íjna jemi í Cáne'a.
 Ayee mú tiu'utáchuiicaca'a.

¹³ Netí'ij ni niyen tíhuá'unamuajri'i í mej
 ti'ichuíca, matíj mena'a pua'amé mej u ta
 japua é'eseijre'e, majta a'ímej mej íiyen seijre'e
 í chaanaca japua, majta a'íime, matíj pua'amé u
 tajete mej é'eseijre'e, majta a'ímej í mej japuan
 é'eseijre'e í jaj ti ve'ée, majta matíj mena'a
 pua'amé a'aseijre'e í jaj tzajta'a. Naími'i mú miyen
 tí'ichuiicaca'a tijín:

Tiché'e rí'í tiraatá'an te'íjna í ti acájca í ípuari jetze,
 teajta te'íjna í Cáne'a.

Tiché'e rí'í tiraatá'an, tiché'e teajta rí'í tirájcha'ii,
 teajta rí'í tiraateájtuaani,
 teajta raatá'an ti nain jín antiújmua'areere
 á'ara'ani tíj na'a ti yú auca'ití a'ame tíj
 na'a rusén jime'e.

¹⁴ Majta a'íime í mej muáacua í mej ruuri, ayée
 mú tiu'utaxájtaca'a tijín:

—Ché'e ayén teja'uré'enen.

Majta a'íime í vaujsi, a'íi mú aicaújtuuxi, majta
 raateánajcheca'a í Dios.

6

Í ti arahua'apuáca jín á'avijti'ihuaca'a

¹ Netí'ij ni raaseíj ti a'ín Cáné'a seíj antína'acaca'a í ti jín á'avijti'ihuaca'a í yu'uxari. Jíme'en pu'u ayén huaríj, aj nu ni ráanamujri'i seíj ti huá'a jetze ajtémé'ecan í mej ruuri, í mej majta muáacua. Ayee pu ca'anín jín tiu'utaxájtaca'a. Cu xíee mej cuj huatéjniuuni. Ayen tijín:

—Iiya'a jíi.

² Neajtahua'a nu atáneereca'a ti pua'a á a'utéjvee a'íjna í cahuaayu'u í ti cuaínara'a. Ajta a'ín ti avé'eca, a'í pu tú'unamí'i huitéhueca'a rumuájca'a jetze. Ajta, a'í pu huirájraa ti ij hua'antimuá'itin. A'u ti na'a pu á'uye'icaa ajta na'a caí najími'ica antimuá'iti.

³ Tí'iquí ajtahua'a ra'antína'acaca'a. Netí'ij ni niyen tiráanamujri'i tí'ij a'ín ti hua'apua ti ajta huá'a jetze ajtémé'ecan í mej ruuri, í mej muáacua, ayée pu tiu'utaxájtaca'a tijín:

—Iiya'a jíi.

Single Line Comp

⁴ Jíme'en pu'u ayén tiu'utaxájtaca'a, seíj pu huirájraa í cahuaayu'u ti pa'useáarara'a. Ajta ayée pu tiraatá'a a'íjna ti avé'eca ti ij a'ín ayén huaú'itziite'en í teite í mej yen seijre'e i chaanaca japua mej mi caí ché'e ru'ihuaamua'a muá'ara'ani sino mej mi huaújcuilini seíj ajta seíj. A'í pu jín, a'í pu ra'ancuré'echui seíj í chun í ti ve'ée, í ti ajta te'ejcamíimijmee ruxí'ejta'a.

⁵ Aj pu 'i huaícacajetze ra'antína'acaca'a. Netí'ij ni niyen tiráanamujri'i ti ajta seíj ti huá'a jetze ajtémé'ecan í mej ruuri, í mej muáacua, a'í pu ayén tiu'utaxájtaca'a tijín:

—Iiya'a jíi.

Netí'ij ni neajtahua'a atáneereca'a. Me'ecui xaa, á pu a'utéjvee seij í cahuaayu'u ti xu'umuara'a. Ajta a'ín í ti avé'eca, a'í pu ráachuisime'e í mej jín te'ecá'itieera.

⁶ Netí'ij ni ja'ati huánamuajri'i. Cu xiee huá'a tzajta'a á'a teja'utaxájtaca'a í mej ruuri, a'ímej í mej muáacua. Ayen tijín:

—Sei medida í triigu, ayée pu che'atá na'a ti'ijnáache a'ame tíj ja'ati ayén tiraamuá'itín seij xicaj jime'e. Ajta hui huaíca medida í triigu ti títi'ijmé'en huíjmuaiyujme, ayée pu che'atá na'a ti'ijnáache a'ame tíj ja'ati ayén tiraamuá'itín seij xicaj jime'e. Mi seajta mú'een, caxu yá'ujipuan a'u mej tejé'ehuaste'e aceituuna ti'iti na'ari uuva ti'iti sino miché'e me'íjna jín huateújvairé'en. —Ayee pu tiu'utaxájtaca'a.

⁷ Ti'iquí ayén í ti muáacua antína'acaca'a. Jíme'en pu'u ayén ra'antína'acaca'a, aj nu ni ráanamujri'i ti a'ín í ti muáacua ti ajta huá'a jetze ajtémé'ecan í mej ruuri. Ayee pu tiu'utaxájtaca'a tijín:

—Iiya'a jíi.

⁸ Neajtahua'a nu atáneereca'a. Netí'ij ni raaseíj ne'íjna í cahuaayu'u í ti cíj tí'iteuumuara'a. Ajta a'ín í ti avé'eca, ayée pu ántehuaa tijín I nej huá'acuí'ica. Ajta í seij í ti cujta'an huamé'ecaa, ayée pu ajta ántehuaa tijín I nej huá'a chí'ij pú'een í mí'ichite. Dios pu ayén hua'utá'a mej mi me'íjna jín antiújmua'areere je'icáj a'ímej í mej yen huachéjme í teite íiyen chaanaca japua mej mi huá'ucuí'ini a'ímej í teite me'íjna jime'e mej tiújne'usí'ite'en nusu tujri jime'e na'ari cuí'ini'ira'a jime'e o a'ímej jime'e í ti'itén í mej tí'itecí'imeca.

9 Tí'iquí í ta'anxívi antína'acaca'a. Netí'ij ni ne'ímej huasej í huá'axiejniu'uca a'ímej í mej me'íjna jín huácuíhuaca'a me'íjna mej ra'ará'astijre me'íjna í niuucari ti jíme'en raxa í Dios, majta me'íjna jime'e mej ra'ancuré'a í niuucari Círíistu'u ti raateájtuaa í huá'a jemi. Majta a'ímej, án mú e'ejté'eca'a í ípuari jete.

10 Majta ca'anín jín jíjhuaca'a tíjín:

—Tavastara'a, mi pej ri'éene'ecán jín seijre'e, mi pej tzáahuati'ira'a jín tí'ixaxa'a, ¿a'achúni auj á'ateeri ajta pena'a caí piyen tiraaxí'epi'íntare'en pe'ímej jime'e í mej táacuii, pej pi puaíjzi hua'utá'an pe'ímej í mej án japuan huachéjme a'ánna chaanaca japua?

11 Tí'iquí hua'uré'epijte í cáixuri í ti tí'tí'ijme, ti ajta tí'icuaína. Ayee pu tihua'utá'ixaa mej nu'u mauj a'atzu tiu'uchú'eve'en ajta na'a caí ayén te'araúrasten a'achú ti ari huá'uxi'epi'íntari'irí'i a'ímej jemi í mej ruxí'ej tí'tíj jín tí'ivaire'eca'a, ajta a'ímej í huá'a'ihuaamua'a í mej miyen che'atá mena'a éeni'ici'e cui'ini matíj a'íime.

12 Tí'iquí í ta'arájsevi antína'acaca'a. Netí'ij ni neajtahua'a atáneereca'a. Me'ecui xaa ne'u. Jé'ecan pu huápi'i huateújca'atzí í chaanaca. Ajta a'ín í xicaj, huatéxu'umuareca'a. Ayee pu seijre'eca'a tíj a'íjna í cáixuri ti xu'umua í mej jín tí'iteújche'etehua'a muá'aye'i ti pua'a maújxiemijte'e. Ajta a'íjna í máxcira'i, a'í pu huatépa'ureca'a. Ayee pu seijre'eca'a tíj xúure'e.

13 Majta a'íime í xu'ura'ave, a'í mú miyen che'atá mena'a é'ejvatzi'ixi í chuej japua tíj a'íjna í táca'ira'an í huaréj ti auj seijre'e tí'ij

huáseevi'i á'aye'i. Ti pua'a a'ñin cíye'ara'an huataújruureajxi'ñin eeca jime'e, naíjmi'i pu cávaijtzí í táca'ira'an.

14 Ajta í ta japua ti tejé'eseijre'e, a'ñi pu e'ehuaújpua'arixi. Ayee pu che'atá na'a huatéeseijre tíj ajta ja'ati yu'uxari huatéejire. Ajta tíj na'a a'utí a'u jirime, ajta tíj na'a a'utí e'erahuáchijmee í jaj japua, naíjmi'i pu huaré'axi. Capu ché'e mu'u é'e seíire'e já'araa í jirí.

15 Majta naími'i í mej yen japuan seijre'eca'a íiyen chaanaca japua, á mú ahuaúravaataca'a já'ahua'a teásta'ana tzajta'a, majta jaij tzajta'a a'ujna jirí jetze. Ayee mú huaríj a'ñime í mej tí'itíj jín títetateí, ti pua'a tajtuhuan pú'een nusu presideente pú'een na'ari í mej tihuá'aijte'e í xantaaru'u nusu í mecaí mej chíjteaani pú'een nusu í mej jeíhua rucaca'anéjme. Naími'i matíj mena'a pua'amé yen seijre'e íiyen chaanaca japua, miyen huateúravaataca'a. Capu amín a'íj ti pua'a ruxí'ej mena'a á'ujujhua'ane'e a'íj ti tihua'aráanajche, na'ari ca'anéeri mú jín tí'imuari'eca'a.

16 Ayee mú tihua'utajé me'íjna í jirí, majta me'íjna í tetej tíjñ:

—Setá'aj yeehui ta japua rájveti sej si ta'avé'enan ti ij caí taaseíj a'íjna í ti acájca í ipuari japua, ajta ti ij caí puaijtzí táaci'iti a'íjna jemi í Cáne'a í ti ari niu'ucami'i.

17 Jee xaa, pu'uri yeehui ayén teja'uré'ene a'íjna xicáara'a mej jetzen puaijtzí taatá'asin me'íjna jime'e mej meri níniu'ucacu, majta capu ja'ati raayí'iti ti te'utáviicua'i a'íjna jime'e.

7

A'íime í mej Israél jetze ajtémecan, í ti Dios hua'avé'ejajpuaxi

¹ Neajta á'iyen muáacuaca huaseíj í mej tí'ivaire'e u ta japua. Aa mú a'uté'uuca'a. Seij pu a'uun jé'eseijre'eca'a u jetze pújme'en Teijmata'a, ajta seij a'ujna já'ahua'a Huáahuata pújme'en, ajta seij Cuameche pújme'en. Ajta í seij, a'úu pu a'utéveeca'a Tzareeme'en pújme'en. Majta a'íime í mej muáacua, a'íi mú caí hua'atá'acare'e í eeca ti huatá'eecare í chuej japua na'ari í jaj japua nusu cıyej tzajta'a.

² Net'íij ni seíj huaseíj ti tí'ivaire'e u ta japua. A'uu pu pújme'en e'evé'eme'ecaa a'u ti 'aíjninei í xıcaj. A'íi pu ru'iteátııca'a a'íjna í ti jın Dios hua'ajtiyú'uxaxij huá'acuaatze'e ti ayén té'axa mej nu'u teitestemua'ame'en pú'een. Aj pu 'i a'íın tevi ayén ca'anın jın hua'utajé a'íimej í mej me'íjna jın antiújmu'a'areereca'a mej a'ij pua'a ráaruuren í chaanaca, majta í jaj ti ve'ée.

³ Ayee pu tihua'utá'ixaa tíjın:

—Caxu xı puaíjtzi raatá'a í chaanaca na'ari í jaj ti ve'ée nusu í cıyej ajta tena'a caí hua'ajtiyú'uxaxi'in huá'acuaatze'e te'íimej í mej ravaire'e í taDioj.
—Ayee mú tiu'utaxájtaca'a.

⁴ Net'íij ni niyen tiráanamujri'i a'achú mej pua'amé í ti hua'ajtiyú'uxaxij í huá'acuaatze'e. Ayee mú pua'améca a'achú cumu anxíte japuan hua'apuate japuan muáacua vi'ıra'a. A'íi mú huá'a jetze ajtémecan matıj mena'a teitestemua'ame'en mej pú'een í mej airájnejjte me'íjna jetze í Israél.

⁵ Majta a'ñime í mej me'íjna jetze airaújnejjte í Judá, ayée mú ará'axcaa tamuáamuata'a japuan hua'apua vi'ira'a. Majta a'ñime í mej me'íjna jetze airaújnejjte í Rubén, ayée mú che'atá ará'axcaa tamuáamuata'a japuan hua'apua vi'ira'a. Majta a'ñime í mej me'íjna jetze airaújnejjte í Gad, ayée mú majta ará'axcaa a'achú cumu tamuáamuata'a japuan hua'apua vi'ira'a.

⁶ Majta a'ñime í mej me'íjna jetze airaújnejjte í Aser, ayée mú che'atá mena'a ará'axcaa tamuáamuata'a japuan hua'apua vi'ira'a. Majta a'ñime í mej me'íjna jetze airaújnejjte í Neftalí, ayée mú che'atá mena'a ará'axcaa a'achú cumu tamuáamuata'a japuan hua'apua vi'ira'a. Majta mú miyen che'atá mena'a ará'axcaa a'achú cumu tamuáamuata'a japuan hua'apua vi'ira'a a'ñime í mej me'íjna jetze airaújnejjte í Manasés.

⁷ A'ímej jime'e í seica, í mej Simeón jetze airaújnejjte, ayée mú majta ará'axcaa a'achú cumu tamuáamuata'a japuan hua'apua vi'ira'a. Majta a'ñime í mej Leví jetze airaújnejjte, ayée mú che'atá mena'a ará'axcaa a'achú cumu tamuáamuata'a japuan hua'apua vi'ira'a. Majta a'ñime í mej Isacar jetze airaújnejjte, ayée mú che'atá ará'axcaa tamuáamuata'a japuan hua'apua vi'ira'a.

⁸ Naími'i mú miyen tamuáamuata'a japuan hua'apua vi'ira'a ara'ástime'ecaa a'ñime í teitestemua'ame'en í mej Zabulón jetze airaújnejjte, majta í mej me'íjna jetze airaújnejjte í José, ayée mú che'atá ará'axcaa mat'í í seica. Majta a'ñime í mej Benjamín jetze airaújnejjte, ayée mú che'atá mena'a ará'axcaa.

*Jíme'en í mej mu'í í mej majta cuaiínavi'in
ti'itéechen*

⁹ Netí'ij ni neajtahua'a atáneereca'a, neajta hua'useíj í seica í mej me'uun e'etiújseire'eca'a. Ayee mú temua'a tí'itemu'íicaa. Capu ri'iríistaca'a ti ja'ati hua'uté'itien. A'u ti na'a mú é'eme'ecantajme'ecaa, matíj mena'a pua'amé me'ín pú'een í teite í mej seij chuéjra'a japua é'eme'ecan, matíj mena'a pua'amé í teite í mej seicié tí'ijye'íra, majta najmi'i mej seicié tí'ixaxa'a. A'uu mú a'uté'uuca'a jemin í Cáne'a. A'íí mú cuaiínavi'in ti'itechéjme'ecaa a'ííme, majta tacíj mú huiitepíjme'ecaa.

¹⁰ Ca'anín mú jín miyen tí'itejijhuaca'a tijín:
Ca'anéri pu jín tu'irájtuaa a'íjna í taDioj í ti acájca í
ípuari jetze,
ajta a'íjna í Cáne'a.

¹¹ Majta a'ííme í mej tí'ivaire'e u ta japua, a'íí mú atavéjme'ecaa a'u ti a'utéveeca'a í ípuari, majta a'u mej a'uté'uuca'a a'ííme í vaujsi, majta a'ííme í mej muáacua í mej ruuri. Matí'ij mi aicaújtuuxi í jemin í ti acájca í ípuari jetze mej mi raateánajche í Dios.

¹² Ayee mú tiu'utaxájtaca'a tijín:
Ché'e ayén teja'uré'enen.
Tu'uri tiyen rí'í tiraatá'asin,
teajta tiyen rí'í tiya'useíira tá'aju'un,
a'íiné a'íí pu nain té'umua'aree.
A'íj tu jín tiyen rí'í tiratá'acare'e tá'aju'un,
teajta rí'í tiraatetúutuhua'a tá'aju'un.
A'íí pu taDioj jemi seíire'e a'ame í
muári'eri'ire'ara'an, ajta í ca'aníjra'a
tíj na'a ti yú auca'ití a'ame tíj na'a rusén jime'e.

¹³ Aj pu 'i seij í ti vástacira'i ayén tinaata'íhua'uri'i tijín:

—¿A'atéenni mej pú'een a'íime í mej cuaiínavi'in ti'itechéjme? ¿A'uné jetze ma'uvé'uju'un?

¹⁴ Net'íj ni niyen tiraata'ixaa tijín:

—Mú'ee vásta'a, mú'ee pej ramua'aree pej piyen tinaatá'ixaate'en.

Aj pu 'i ayén tinaatá'ixaa tijín:

—A'ii mú hui me'ín pú'een í mej te'utáviicua'iri'i í mej jeíhua huáp'i rajpuaítzi muá'araa. A'ii mú meri tiu'ujá'usi í tiú'ujcixu, majta tiú'ucuaiinare í tihúa'acixu me'íjna jime'e mej ra'ará'astijre me'íjna í Círíistu'u í ti huá'a jetze me'ecan huam'íi.

¹⁵ 'A'íj mú hui jín miyen íye seijre'e jemin í ipuari ti jetzen acájca a'íjna í Dios. A'íj mú majta ravaire'e teyujta'a a'u ti a'ín Dios é'eseijre'e. Nain tújca'ari tzajta'a, majta nain t'ca'ari tzajta'a, a'úu mú ravaire'e. Ajta a'ín ipuari jetze ti acájca, a'íj pu huá'acha'ín a'íjna jime'e ti rusej huá'a jemi huateáturaasin.

¹⁶ 'Camu hui ché'e huatatújritze'esin, camu majta ché'e huata'í'icu. Capu ajta ché'e huá'acucui'i a'ame í hua'amu'úu í xicaj jime'e. Capu ajta ché'e hua'ataíxi'ira a'ame í xicaj.

¹⁷ 'A'iné a'íj pu Cáne'a a'íjna jetze á a'utéjvee í ipuari. A'íj pu huá'acha'íi a'ame. A'íj pu huá'avi'itin a'ájna a'u ti jé'ejmuaa í mej jín ruuri muá'ara'ani. Ajta a'ín Dios, a'íj pu r'íi tihua'utá'asin mej mi caí ché'e ti'iti jín ruxiémiste'e.

8

I ti jín aráhua'apua á'avijti'ihuaca'a, ajta í cítzive'eri

¹ Tí'iquí a'ín Cáne'a ra'antína'acaca'a a'íjna í ti jín á'avijti'ihuajme'ecaa, a'íjna í ta'aráhua'apua. Aj pu 'i nainjapua tiu'upuá'areajraa u júte'e. Ayee pu á'atee a'achú cumu já'ita'a hora ti caí tí'iti namuajre'eca'a.

² Net'íj ni hua'useíj í mej aráhua'apua, í mej majta tí'ivaire'e u ta japua. A'íí mú a'ín pú'een í mej Dios jemi huaté'uuca. Mat'íj mi te'encuré'í í trompeeta, í ti aráhua'apua.

³ Aj pu 'i seij mú a'uvé'emej ti ajta tí'ivaire'e u ta japua. A'íí pu jetzen ajteechaxi a'íjna í mej japuan tí'imuai'ivajtaca. Ajta tí'iti huiitéjajnaca'a cítzive'eri. Seij pu raatatíste í cuaane'e ti ij a'íjna rajnájchite'en a'íjna jamuan í niuucari í mej jín raatáhuaucare'e í Dios jemi matíj mena'a pua'amé í mej rí'í tí'iteseijre'e í Dios jemi. Ajta, a'íjna í hua'aniuuca, án pu jé'eseijre'eca'a japuan a'íjna í ti oro jín taavíjhua í mej japuan tí'imuai'ivajtaca ti ajta jemin a'utéjvee a'íjna í ipuari.

⁴ Aj pu 'i temua'a té'ejcitziuhtarixi a'íjna í cuaane'e a'íjna jamuan í niuucari í mej jín raatáhuaucare'e í Dios jemi. A'íj pu jetzen ájcitziujtareca'a a'íjna í muájca'are'ara'an a'íjna í ti tí'ivaire'e u ta japua.

⁵ Aj pu 'i rájtíi a'íjna í cítzive'eri, ajta ra'avé'ejiste a'íjna í taij ti a'uun a'uvé'emej a'íjna japua í mej japuan tí'imuai'ivajtaca. Aj pu 'i á ya'ucáaxire í chaanaca japua. Jíme'en pu'u ayén huaríj, aj nu ni ráanamujri'i. Cu xíee muatéjniuu. Jé'ecan pu temua'a tí'itéca'arajnajme'e. Majta témaxcava'ara'a. Ajta huatéújca'atzíjxi í chaanaca.

Jíme'en í trompeeta í mej te'ité'í'ca'a

6 Majta a'íime í mej aráhua'apua ará'ase, í mej majta tí'ivaire'e u ta japua, a'íime í mej trompeeta te'ité'i'ica'a, a'íí mú r'íi huaújruu mej mi me'íjna tzajta'a ucáajijhua.

7 Ajta a'íjna ta'amuájca, a'íí pu ucáajijhuaca'a a'íjna tzajta'a í trompeeta. Jíme'en pu'u ayén huaríj, mat'íj mi téetej cáavatzí a'íjna jamuan í taij, xúure'e tí ranaxca. Nainjapua pu huavátzi íyén chaanaca japua. Ajta je'icáj pu tiu'uré'ataa. Ajta a'íín í ciyej, je'icáj pu ajta tiu'uré'ataa. Ajta í íxaj, naími'i pu huaré'ataa a'íjna.

8 Ajta a'íín í tí hua'apua í tí tí'ivaire'e u ta japua, a'íí pu ajta ucáajijhuaca'a a'íjna tzajta'a í trompeeta. Ajta tí'iti pu ateájrie í jaj jetze í tí ve'ée. Cu xíee jíri na'a a'íjna í tí'iti í tí ajta teátaasime'e. Tí'iquí á a'ucájrupi á jaata'a. Aj pu 'i je'icáj seicíé huaújruu í jaj tíj xúure'e.

9 Majta je'icáj mú huácuii í mej me'uun é'echejca'a. Majta, me'ín í baarcu í mej japuan é'eciñeca'a í jaj, je'icáj mú majta huateána'axi.

10 Ajta a'íín í tí huaíca, a'íí pu ajta ucáajijhuaca'a a'íjna tzajta'a í trompeeta. Jíme'en pu'u ucáajijhuaca'a, aj pu 'i xu'ura'ave tí ve'ée e'icájve u júte'e. Ayee pu té'ataaca'a tíj tatzari. Aj pu 'i á e'erájve je'icáca japua í játe'ana, ajta je'icáca japua a'u tí e'ejáixavi'ijme.

11 Ajta a'íín í xu'ura'ave, ayée pu ántehuaaca'a tíjín Ta'antzíjvi'i. Je'icáj pu antzíivi'i já'araa í jaj. Majta í teteca, mu'íití mú huácuii me'íjna jime'e mej ra'í me'íjna í jaj í tí antzíjvi'i.

12 Ajta a'íín tí muáacua, a'íí pu ajta ucáajijhuaca'a í trompeeta jetze. Jíme'en pu'u ayén huaríj, tí'iti

pu ra'ajteátu'a í xicaj, ajta í máxcira'i, ajta je'icáj í xu'ura'ave mej mi caí ché'e miyen a'atáatime'eni. Je'icáj tújca'ari tzajta'a, camu ché'e á'ataaca'a, ajta je'icáj tíca'ari tzajta'a, camu majta ché'e á'ataaca'a.

¹³ Net'í'ij ni niyen á'ujneereca'a. Júte'imua pu se'ij rá'ara'aca'a í cua'ira'ave. Net'í'ij ni niyen ráanamujri'i ti ayén tí'ixajtaca'a tíjín:

—Cui'i xaa, cui'i xaa, cui'i xaa, a'íime hui í mej íiyen japuan huachéjme í chaanaca, a'iné je'íhua mú hui rajpuaítzi muá'aju'u mat'í'ij miyen ucáajijhua í seica í mej hua'íca í trompeeta jetze. Pu'uri hui t'ín ayén teja'uré'enejsin.

9

¹ Aj pu 'i a'ín ta'anxívi ayén ucáajijhuaca'a í trompeeta jetze. Jíme'en pu'u ayén huaríj, net'í'ij ni raase'ij í xu'ura'ave ti ari e'icájve u júte'e, ajta án e'erájve í chaanaca japua. Ajta a'ín, a'í pu ra'ancuré'echui a'íjna í yaavi í ti jín ra'antácuuna a'u ti e'etécun ti caí ayén té'emitieere'e a'achú ti ucátee.

² Aj pu 'i a'í pu ayén ra'antacú a'íjna ti e'etécun ti ayén caí ámitieere'e a'achú ti ucátee. Jíme'en pu'u ra'antacú, ayée pu huitácitziujtareca'a tíj te'ítácitziúuta á'aye'i í hoorno tzajta'a ti ve'ée. Ajta a'ín í xicaj, ajta í máxcira'i, a'í mú a'utanám'íhua muá'araa me'íjna jíme'e í citzij ti aítácitziujtaca'a a'ujna a'u ti e'etécun.

³ Mat'í'ij mi vítz'i'ise huiitací citzij tzajta'a. Ayeé mú tihua'utá'a mej mi miyen tiú'uche'eve'en mat'í'ij a'íime í teaxcáte.

4 Ayee mú tihua'u'íjca mej nu'u caí a'ij pua'a raruure í íxaj ti ájninei í chuej japua na'ari tu'upi ti'iti nusu c'ijej. A'ii mu'u nu'u a'íjn pú'een í mej a'ij pua'a huá'aruuren, a'ímej í teite í ti caí té'eyu'usil'i huá'acuaatzi jetze mej nu'u teitestemua'ame'en pú'een í Dios.

5 Ayee mú tihua'utá'a mej miyen á'ateeri a'achú cumu anxíj máxcira'i mej puaíjtzi hua'utá'an í teteca. Majta, camu miyen tihua'utá'a mej huá'ucui'ini. Ajta, a'íjna í mej jín puaíjtzi hua'utá'asin, ayée pu che'atá na'a 'een ti pua'a teáxca raache'en í ja'ati.

6 Ayee pu té'eme a'íjna xicáara'a jetze. Ayee mú rahuauni í teteca mej huá'cui'ini. Mi ajta, capu a'ij tiu'utári'iriistari. Jéihua mú huápi'i jetzen á'ujca'ane mej huá'cui'ini mej mi caí ché'e rapuaíjtzi. Mi majta, ca'anéeri mú jín te'utáviicua'ira.

7 Majta me'ín vítzilise, ayée mú seijre'eca'a matíj cahuaayu'use í mej meri hua'acáanajxi mej mi japuan huané'use'en. Ti'iti mú ave'erújte'eme'ecaa í rumu'úu jetze. Ayee pu seijre'eca'a tíj curuun ti oro jín taavíjhuaca'a. Ajta, hua'aneerime ayén seijre'eca'a matíj teite.

8 Ayee mú majta éene'e cácipuaca'a matíj 'uuca, majta miyen éene'e antátamejca'a matíj muajyéte.

9 Nainjapua mú ti'icáaujncaa ti'itij jime'e tíj tepúusti'i pú'eene'e. Majta, jeíhua huápi'i cá'arajna'a matí'ij tirá'ara'ixi. Yee pu 'eene'e namuajre'eca'a matíj a'íime í cahuaayu'use í mej ca'anín jín ru'uvé'ejapuaime'e í carreta í mej tzajta'an huaté'uuca'a a'íime í mej uné'use'en.

10 Ayee mú éene'e huácuasi matíj teaxcáte. Ajta a'íjna í huá'amuari'eri'ira'a í mej jín miyen éene'e á'ateeri anxíj máxcira'i mej puájtzi hua'utá'asin í teteca, a'íi pu huá'acuasi seijre'e.

11 Ajta a'ín ti tihuá'ajjte'e, a'ii pu a'ín pú'een í xiéjniu'ucari ti nain jín antiújmua'aree a'ujna ti e'etéecun ti caí ámitieere'e a'achú ti caj ucátee. Ayee pu ántehuaa hua'aniuuca jime'e a'íime í Hebreos tíjín Abadón. Ajta hua'aniuuca jime'e í Griego, ayée pu ántehuaa tíjín Apolión. Ayee pu huataújmua'a tíjín: A'ijna ti e'ihuajé'ica.

12 Pu'uri seíj mú á'ume í mej jín rajpuaítzi muá'ara'ani. Ajta aúche'e hua'apua á'atura ti ayén teja'uré'enen.

13-14 Aj pu 'i a'ín ti arájsevi, a'íi pu ajta ucájijhuaca'a í trompeeta jetze. Jíme'en pu'u ayén ucájijhuaca'a, netí'ij ni ja'ati huánamuajri'i ti a'uun tí'ixajtaca'a a'u ti a'utéjvee a'íjna í mej japuan tí'imuai'ivajtaca. Ayee pu tiraata'ixaa a'íjna ti ucájijhuaca'a tíjín:

—Patá'aj huá'ijxistaxi'in a'ímej í mej muáacua í mej majta aiteánami'i a'ujna vejli'i játe'ana jetze ti ve'ée ti ayén téja'arájtehuaa tíjín Eufrates.

15 Aj pu 'i huá'uxistaca'a a'ímej í mej muáacua, í mej majta aiteánami'ihuaca'a ajta na'a caí a'ájna teja'uré'enen í xicáara'an mej jetzen huácu'i'ini je'icáj í teite í mej yen japuan huachéjme. Pu'uri p'ti'ihuaujxi'epi'intare a'atzaj ti pua'a, ti'itáani xicáara'an, ajta ti'itáani máxcira'ira'an, ajta ti'itáani nine'ira'a ti ayén huárini.

16 Majta me'ín í xantaaru'u, í mej avé'ete'ete, ayée mú ará'aseca'a a'achú cumu seité vi'ira'a

pua'amé mej mé'e, majta ayée mú pua'amé a'achú cumu tamuáamuata'a vi'ira'a í mej miyen pua'amé mej mé'e. Ayee nu tiú'unamuajri'í a'achú mej pua'amé ará'aseca'a.

17 Neajta, ayée nu éene'e hua'usej í cahuaayu'u netí'ij niyen tiú'umaaraca'a. A'íime í mej avé'ete'ete, ayée mú anteújna í rútaviitze'e ti'itij jime'e ti ayén seijre'e tjj tajj ti á'ataa, ajta í ti cuatujmua, ajta í ti teúumua. Majta a'íime í cahuaayu'u, ayée mú 'eene'e huíjmu'uu matíj muajyéte. Ajta í ti án huá'atene'e jetze aijnineica'a í tajj, jamuan í citzij, ajta a'íjna ti teúumua ti ayén té'eeca tjj tepúusti'i.

18 Matí'ij je'icáj huácuihuaca'a í teteca í ti huaíca jetze í mej jín puaíjtzi hua'utá'a, a'íjna jín í tajj, ajta a'íjna í citzij, ajta a'íjna í ti ayén té'eeca tjj tepúusti'i, tjj na'a pua'amé aijnineica'a án huá'ateni'itze'e í cahuaayu'u.

19 Jee xaa ne'u, ayée mú tiraayí'iti mej titéecui'ini me'íjna jime'e í rutene'e. Ayee mú majta éene'e huácuasi matíj cu'ucu'use, majta miyen éene'e huíjmu'uu. Majta í mej jín puaíjtzi hua'utá'a í teteca.

20 Majta me'ín í seica í mej yen japuan seijre'eca'a íiyen chaanaca japua, í mej caí huácuihuaca'a me'íjna jime'e í cuí'ini'ira'a, camu raatéxíeehuataca'a í mej ti'iti huátaahuan í ti caí Dios pú'een. Camu majta raatapuá'ajtaca'a mej miyen raná'amiche'en me'íjna í tiyaaru'u na'ari me'íime í ti'iti tévira'a ti ayén taavíjhua oro jime'e na'ari plata jime'e nusu cobre jime'e ca'ín tetej jime'e o ciyej jime'e, ti'iti ti na'a, mej caí

atanéjne'e. Camu majta huiteánajca'amua. Camu majta racínivejme.

²¹ Majta a'íime í teite, camu majta raatapuá'ajtaca'a mej caí tí'itecuil'ica. Majta me'íjna í chahuaiiri camu majta raatapuá'ajtaca'a mej caí ramuari'e me'íjna í ti tiu'utéhua'itaca'a tí'ij aráuasten í hua'aye'ira. Majta í teite, mauche'e mú miyen ruxána'acire'eca'a, majta tiú'unahua'iraca'a.

10

I ti ta japua tí'ivaire'e, ajta a'íjna ti jíri'i ti ajta jetzen té'eyu'usi'i

¹ Netí'ij ni neajtahua'a seíj huaseíj ti tí'ivaire'e u ta japua. Jé'ecan pu ruca'ané a'íjna, ajta júte'e pu ve'ecáme'ecaa. Jaitiri pu racánajca'a, ajta cu'uxaí atavíjca'a í mu'úura'an jetze. Ayee pu té'ajtaave'e í néerime'ara'an tíj í xicaj, ajta ayén seijre'eca'a í íicájra'an tíj tí'iti ti teátaasin.

² A'íi pu ru'itépijcaa í rumuájca'a jetze í yu'uxari ti cílieen. Pu'uri autácuuri'ihuaca'a. Aj pu 'i e'era'íicataca'a í jaj japua í ti ve'ée a'íjna jime'e í ru'íica ruri'irínta'a pújme'en. A'íi pu ajta e'era'íicataca'a í chuej japua í seíj jime'e í ru'íica ru'úutata'a pújme'en.

³ Aj pu 'i ca'anín jín huajíjhuaca'a. Ayee pu namuajre'eca'a tíj muajye tí'iji'ihuaca. Jíme'en pu'u ayén tiu'ujíjhuaca'a, matí'ij mi huatéeniu a'íime í mej aráhua'apua ará'ase.

⁴ Matí'ij miyen huatéeniu, nee nu ra'ayú'uxaache'e. Neajta á'iyen ráanamujri'i í ja'ati ti júte'e neja'utajé ayén tíjín:

—Patá'aj rú'umua'areere a'ij mej tiu'utaxájtaca'a í mej huatéeniu a'íime í mej aráhua'apua ará'ase. Capej rá'ayu'uxa.

5-6 Ajta a'ín í ti ta japua tí'ivaire'e í nej raaseíj ti jaj japua e'era'ícataca'a, ajta chuej japua ajta e'era'ícataca'a, a'í pu ajmeíjca'ataca'a, ajta ayén te'ataújratziiri'i ti nu'u ari teja'uré'enejsin a'íjna xicáara'an ti jetzen nain te'entipué'ari. A'íj pu jetze te'ataújratziiri'i í niuucajtze'en a'íjna ti rusén jín ruuri. A'í pu a'ín pú'een í Dios ti ta japua a'utéjmuua huatétaahuaca'a, ajta naijmi'ica ti a'uun é'eseijre'e. A'í pu ajta raatétaahuaca'a í chaanaca í tej japuan yen seijre'e. A'í pu ajta raatétaahuaca'a tíj na'a ti japuan tí'iseijre'e, ajta í jaj ti ve'ée, ajta tíj na'a ti a'uun é'eseijre'e.

7 Ayee pu tiu'utaxájtaca'a a'íjna í ja'ati ti nu'u a'íjna a'araúrastejsin a'íjna í ti rú'avaa í Dios jemi a'ij ti a'ín Dios te'ataújratziiri'i huá'a jemi í mej ravaire'eca'a me'íjna jime'e mej jetzen me'ecan tí'ixaxa'ata'a. A'íjna pu nu'u ayén a'araúrastejsin a'íjna xicáara'an ti jetzen ucáajijhua í ti ta japua tí'ivaire'e í ti aráhua'apua pú'een.

8 Aj pu 'i a'ín í nej ráanamujri'i ti júte'e teja'utaxájtaca'a, ayée pu tinaatá'ixaa tíjín:

—Aricu, a'íjna jemi patá'aj ra'ancuré'í'in í yu'uxari ti autácuuri'i muájca'are'ara'an jetze a'íjna ti ta japua tí'ivaire'e, ti a'uun japuan huatéjvee í jaj japua, ti ajta a'uun japuan huatéjvee í chuej japua.

9 Net'íj ni ne'uun á'ume ne'íjna jemi ti ta japua tí'ivaire'e. Ayee nu tiraata'ixaa ti naata'í'ite'en í yu'uxari ti cíleen. Aj pu 'i ayén tinaatá'ixaa tíjín:

—Ye'ecui, ne'u. Patá'aj hui raatéjcu'ani. A'íi pu mua'atzívite'e a'ame mua'a jucaatze'e. Ajta, ayée pu mua'améncate'e a'ame mua'aténi'itze'e t'íj searate.

¹⁰ Netí'ij ni ra'ancuré'i ne'íjna í yu'uxari ti c'ílieen. A'uu nu ye'encuré'íi í muájca'are'ara'an jetze a'íjna ti ta japua tí'ivaire'e. Netí'ij ni raatéjcu'aa. Jé'ecan pu naa tinú'ucacarejca'a í neteni jaítze'e t'íj searate. Ajta, netí'ij yá'uxij, jé'ecan pu ná'atzijvire'eca'a yé nejucáatze'e.

¹¹ Aj pu 'i ayén tinaatá'ixaa t'íjín:

—Ayee pu ajta ayén tiú'ujxe'eve'e pej pajtáhua'a tiu'utaxáj a'ímej jemi í teite í mej seij chuéjra'a japua é'eme'ecan, í mej majta seij niuucari jín tí'ixaxa'a, pajta huá'a jime'e í mej tihuá'aijte'e.

11

Jíme'en í mej hua'apua í mej te'anxájta

¹ Aj pu 'i ja'ati naatáchui tí'iti c'íyey í mej jín tí'itieeraca a'achú ti huatátee. Ayee pu tinaatá'ixaa t'íjín:

—Iiya'a jíi, patá'aj hui raaté'itien a'achú ti antayaúj í teyuu a'u mej yé'ana'amiche í Dios, patá'aj pajta raaté'itien a'achú ti auuyaúj a'íjna í mej japuan tí'imuai'ivajtaca. Patá'aj pajta hua'uté'itien a'achú mej pua'amé í mej me'uun rana'amiche.

² 'Pajta, capej hui pe'uun ra'itíe'e a'achú ti antayaúj a'ujna á pua'acíe ti e'eráyaujta'a. Patá'aj rujímua'a raateájtuaani a'iné Dios pu ari hua'utá'a í mej seij chuéjra'a japua é'eme'ecan mej mi miyen á'ateere a'achú cumu hua'apuate japuan hua'apua máxcira'i mej

me'uun ra'avé'echetzi'inaxi'in me'íjna chajta'a ti Dios ayén rusej huateúra'ate.

³ Neajta inee, ayée nu hui tihua'utá'asin a'ímej í mej hua'apua í mej ca'aníjra'a ti'itá'aca inee jime'e í muári'eri'ira'a mej mi miyen á'ateevi'in a'achú cumu seivi'ira'a japuan tamuáamuata'ate japuan huaícate xicaj mej tihua'utá'ixaate'en neetzi jetze me'ecan. Ayee mú me'íjna jín ti'itéechen me'íjna jime'e í mej jín ti'iteújche'ete a'íime í mej ruxiéemiste'e me'íjna ti seij huamí'i.

⁴ A'ii mú hui a'ín pú'een í huaréj í ti'ihua'apua í ti jemin e'etávee í tavástarara'a ti íiyen tí'ajta chaanaca japua. A'ii mú hui majta me'ín pú'een í mej hua'apua í meta'antitátzajmee. A'íi mú xaa jemin seijre'e í tavástarara'a.

⁵ Ti pua'a ja'ati ayén tí'ijxe'eve'e ti a'ij pua'a huá'uruuren, taij pu 'aíjninei án huá'ateni'itze'e, ajta huá'amua'itici a'ímej í mej huá'ajcha'ire'e. Jee xaa, ti pua'a hui ja'ati ayén tí'ijxe'eve'e ti a'ij pua'a huá'uruuren, ayée pu ti'ihuaújxi'epi'intare a'íjna jemi í ja'ati mej me'ín raajé'ica.

⁶ Majta a'íime í mej hua'apua, a'íj mú hui jín antiújmua'areere muá'aju'u mej hua'utá'ijmí í viite mej mi caí ché'e viiye mat'íj mauj tihuá'ixaate'e í teite. A'íj mú jín miyen tite'entiújmua'aréere muá'aju'u mej seicié ráaruuren í jaj t'íj ayén huataújru'ure'en t'íj xúure'e. Ayee mú che'atá mena'a jín tite'entiújmua'aréere muá'aju'u mej puaíjtzi hua'utá'an a'ímej í teite í mej íiyen seijre'e í chaanaca japua. Nain mú hui jín puaíjtzi hua'utá'asin í cu'íni'ira'a jime'e t'íj na'a ti ayén tihua'aráanajche.

7 Matí'ij ra'antipua'ajte'en í mej jín naatéxajta, aj pu 'i til'iti a'uun a'itaméj a'u ti e'etécun í ti caí ámitieere'e a'achú ti ucátee. A'íi pu hui hua'uténe'usi'ite'esin, ajta huá'acui'ini, ajta, hua'utémua'iti.

8 A'uu mú majta a'uté'e muá'aju'u í mi'ichite caaye jetze a'ujna já'ahua'a chajta'a jetze ti ve'éé í ti nu'u ayén téja'arájtehuuaa tijín Sodoma, ajta ayén tijín Egipto. A'uu pu hua'avastara'a á'utataihuaca'a í cúruu jetze.

9 Ayeé mú mi'ichite huáruuren a'íime í teteca mej nain japua huachéjme, a'u ti na'a seíj chuéjra'a japua, a'íime í mej seíj niuucari jín tí'ixaxa'a, a'achú mej pua'amé ará'ase í teitejra'an. Huaíca xicaj japan já'ita'a mú hua'aseíira muá'aju'u í mi'ichite. Majta, camu huatá'acare'e muá'aju'u ti ja'ati hua'avé'enan.

10 Majta a'íime í mej íiyen huachéjme í chaanaca japua, jeíhua mú huataújtemua'ave'esin me'íjna jime'e í mej meri huá'ucuii. A'íi mú majta me'íjna jín tí'iyesten, majta tiu'utaújpuaijve'esin til'iti me'íjna jime'e í mej caí ché'e huá'ítziite'e a'íime í mej hua'apua í mej tí'ixaxa'ata'a í Dios jetze me'ecan, í mej majta nu'u puaíjtzi hua'utá'a a'íimej í mej íiyen seijre'e i chaanaca japua.

11 Tí'ij teuumé'eca huaíca xicaj japan já'ita'a, xiéjniu'ucare'ara'an í Dios, a'íi pu huateájturaa a'íimej jemi í mej hua'apua. Ajtahua'a pu hua'utatíste í huá'axiejniu'uca í mej jín ruuri. Matí'ij mi ájhuiixi. Majta jeíhua tiu'utátziin a'íime í mej hua'useíj.

12 Matí'ij mi ráanamujri'i ti ja'ati ca'anín jín u e'icájijhuaca'a u júte'e ayén tijín:

—Iiya'a, xá'ajc̄inichi seyujna júte'e, jait̄iri jetze u ta japua.

Mat̄'ij mi tic̄ij, mehua'aseíiraca'a í mej huá'ajcha'ire'eca.

¹³ Jíme'en mu'u tic̄ij, aj pu 'i huateújca'atzijxi í chaanaca temua'a naa. Ajta je'icáj pu é'evatzijxi í tihuá'achi'i í ti a'uun a'uvéjme'ecaa. Majta aráhua'apuavi'ira mú huácuii í teite t̄'ij huateújca'atzijxi. Majta a'íime í seica í teite, jeíhua mú huápi'i tiu'utátziin, majta r̄'i tiraatéje í Dios.

¹⁴ Pu'uri mú á'ume í mej j̄in rajpuaíjtzi í ti hua'apua. Ajta pu'uri t̄in teja'uré'enejsin í ti huaíca í mej j̄in rajpuaíjtzi muá'aju'u.

I trompeeta ti aráhua'apua

¹⁵ Aj pu 'i a'ín ti júte'e tí'ivaire'e, a'íjna ti aráhua'apua pú'een, a'í pu ajta ucájijhuaca'a. Neajta huá'unamuajri'i mej ca'anín j̄in tí'ixajtaca'a u júte'e, miyen tij̄in:

Pu'uri xaa te'enteájrupi í tavástar'a,
a'íjna í ti Dios ra'antíhua'u.

Pu'uri nain j̄in antiújmua'aree ti tíhua'uta'aíjte'en
a'ímej í mej huachéjme a'ánna chaanaca japua.

A'í pu tíhua'uta'aíjte'esin tíj na'a
ti yú auca'ití a'ame tíj na'a rusén jime'e.

¹⁶ Majta a'íime í vaujsi í mej seité japuan muáacua ará'ase, í mej majta huá'ipuari japua e'eré'etei í Dios jamuan, a'í mú aicaújtuuxi, majta raateánajcheca'a í Dios.

¹⁷ Miyen tij̄in:

R̄'i tu timuaatá'aca, tavástar'a,
mi pej Dios pú'een,
mi pej pajta nain j̄in antí'amua'aree,

mi pej pajta seijre'e íjii,
 mi pej pajta seijre'eca'a jéjcuá imuá.
 18 Majta a'íime í mej seij chuéjra'a japua
 é'eme'ecan,
 matíj pua'amé, jeíhua mú huápi'i
 níniu'ucacuca'a.
 Pajta mú'ee, pepu'uri huataniú'ucaca'a.
 Pu'uri a'ájna teja'uré'ene a'íjna xicáara'a pej jetzen
 huá'axijte'en a'ímej í mej meri huácuíi.
 Patá'aj rí'i tihua'utá'an pe'ímej í mej muavaire'e,
 a'íime í mej mú'eetzi jetze me'ecan tí'ixaxa'a,
 majta a'íime í mej mú'eetzi jemi rí'i
 tí'iteseijre'e.
 Patá'aj rí'i tihua'utá'an matíj pua'amé
 muá'astijre'e.
 Capu amín ti pua'a miyen ve'ecán jín títetaté'en
 na'ari cíliéene'e jín metítetateín.
 Patá'aj pajta hua'antipúa'ajte'en a'ímej
 í mej meri hua'upuá'ajte a'ímej
 í mej íiyen chaanaca japua huachéjme.
 Ayee mú tiu'utaxájtaca'a a'íime í mej seité japan
 muáacua ará'ase.
 19 Aj pu 'i a'ín í teyuu a'u ti Dios é'eseijre'e
 u ta japua, a'í pu antácuunareca'a. Ajta a'uun
 teyujta'a seijre'eca'a a'íjna í chí'ij ti cíliéen ti ajta
 tzajta'an urácatii í niuucari ti jín te'ataújratziiri'i
 í Dios. Matí'ij mi huatémaxcava'axi a'ujna teyu-
 jta'a, majta téniuuca'a. Jéihua pu ca'anín jín
 tí'itécá'arajnajme'e. Huatéújca'atzijca'a í chuej,
 majta cáavatzi í tétej.

12

I'íta'a, ajta í cu'ucu'u

¹ Aj pu 'i ti'iti huataseíjre u júte'e í nej jín rí'i te'utaseíj. 'Íita'a pu seijre'eca'a ti ayén éene'en ti'itéchejca'a cáxuri jime'e ti naa ti'itetáatiye'i tíj í xicaj. Ajta máxcira'i japua újveeca'a a'íjna í 'íita'a. A'íi pu curuun ajta u'uteárujte'ecaa ti jetzen seijre'eca'a ti'iti cumu xu'ura'ave. Ayee mú ará'aseca'a a'achú cumu tamuáamuata'a japuan hua'apua.

² Pu'uri autájucaca'a, ajta ruyeineca'a a'íjna jime'e ti rá'acui'ícaa a'iné pu'uri tén tiyaúj a'ame.

³ Ajtahua'a sej huataseíjre. Me'ecui xaa, a'íjna í cu'ucu'u í ti pa'u, í ti vivéj. Arahua'apuáca pu huíjmu'uu, ajta tamuáamuata'a ave'ehuájme. A'íi pu ajta ru'uteárujte'ecaa í curuun í ti aráhua'apua.

⁴ Ajta, rucuasi pu jín hua'aré'ana je'icáca a'ímej í xu'ura'ave í mej júte'e é'eseijre'e. Aj pu 'i hua'ajájpua'a. Aj pu 'i huaje'icáhua'axi íiyen chaanaca japua. Ajta a'ín í cu'ucu'u, áa pu vejli'i jemin a'utéchaxi a'íjna í 'íita'a ti ari tén tiyaúj a'ame tí'ij raatéci'ime tí'ij huanú'ihua í uneeca'i.

⁵ Aj pu 'i tiyaúj já'araa, teáatacan. A'ii pu a'ín pú'een ti ca'anéeri jín tíhua'uta'aíjte'esin matíj mena'a pua'amé í mej chaanaca japua é'eme'ecan. Ajta a'ín uneeca'i, Dios pu ya'uví'iti u ta japua a'u ti é'eseijre'e í ipuari ti japuan acájca í Dios.

⁶ A'íjna í 'íita'a, áa pu huataúruu a'ujna pújme'en a'u ti caí'é'e ja'ati, a'u ti ajta Dios rí'i yá'uruurijtze. A'uu pu á'ateeri a'achú cumu seivi'ira'a japuan tamuáamuata'ate japuan huaícate xicaj. Ajta a'ín í Dios, a'íi pu racha'íi a'ame.

⁷ Mat'íj mi autéjhuii mej huaténe'use'en í ta japua. A'íjna í Miguel, majta í mej jamuan

tí'ivaire'eca'a, a'íi mú rané'usil'ite'eca'a me'íjna í cu'ucu'u, majta me'íjna í mej ravaire'eca'a í cu'ucu'u.

⁸ Mat'íij mi hua'utéemua'iti me'íjna í cu'ucu'u, majta a'íimej í mej ravaire'eca'a. Capu ché'e hua'utá'a mej me'uun a'uté'uuca'a u ta japua.

⁹ Mat'íij mi ye'icájríe me'íjna í cu'ucu'u ti vivéj, a'íjna í cu'ucu'u ti jécua imuá seijre'eca'a, a'íjna í tej tiyen ratamuá'amua tíjín tiyaaru'u, teajta í tej tiyen ratamuá'amua tíjín Satanás. A'íi pu a'íin pú'een a'íjna í ti huá'acuanamua mat'íj mena'a pua'amé yen seijre'e íiyen chaanaca japua. Aj mú mi aye'icájríe íiyen chaanaca japua, jamuan í mej ravaire'eca'a.

¹⁰ Net'íij ní ráamua'areeri'i ti ja'ati a'uun ta japua a'utéveeca'a. Tí'iquí ca'anín jín tiu'utaxájtaca'a ayén tíjín:

—Pu'uri hui xaa ayén teja'uré'ene ti a'íin í taDioj ari hua'irájtuaa a'íimej í mej rá'astijre'e. Pu'uri nain jín antiújmua'aree ti ij tíhua'uta'aíjte'en naíjmi'lica tíj na'a rusén jime'e. Pu'uri hui nain jín tira'íjca a'íjna í Ciríistu'u ti ari ra'antíhua'u, a'iné pu'uri ya'ucájríe a'íjna ti tihuá'axajtzi'i í ta'ihuaamua'a. Nain xicaj tzajta'a, ajta nain tíca'ari tzajta'a, a'íi pu hui ayén tihuá'axajtzi'i a'íjna jemi í Dios.

¹¹ 'Majta me'ín í ta'ihuaamua'a, a'íi mú me'íjna jín ra'antimuá'iti me'íjna jime'e ti a'íin Cáne'a ra'iráaxire í ruxuure'e tíj mua'íivéjri í Dios jemi, majta mú ra'antimuá'iti me'íjna jime'e mej miyen tihua'utá'ixaate'eca'a a'íjna jime'e í niucari í ti jime'en raxa í Ciríistu'u. Camu a'atzu raatéxiehuataca'a mej rá'astijre'e. Capu amín

a'ij ti pua'a ja'ati ayén huá'aneche ti huá'ucui'ini. Maúche'e mú rá'aviicua'i.

12 'Setá'aj siyen huaújtemua'ave'en mi sej seyun seijre'e ta japua, seajta mú'een, mi sej seyun tí'ivaire'e. Seajta mú'een, mi sej seyun huachéjme se'újna chaanaca japua, seajta mú'een, mi sej se'uun a'uté'uuca'a í jaj japua, cui'i xaa, a'iné mú'ejmi jemi ari huatasejre a'íjna í tiyaaru'u. Ajta í'iniu'ucami'i huápi'i a'iné pu'uri ramua'aree ti caí chéle á'ateeri, a'iné Dios pu'uri ra'iteánajsin. —Ayee pu tiu'utaxájtaca'a a'íjna í Dios.

13 Ajta a'ín í cu'ucu'u, tí'ij ráamua'areeri'i ti a'uun é'ejve í chaanaca japua, aj pu 'i raatavén a'íjna í 'íta'a í ti tiyaúj já'araa.

14 Ajta Dios pu ayén tiraatá'a a'íjna í 'íta'a ti ráavaire'en tí'ij ca'anacan tícheni a'u ti a'ij éene'e a'íjna jemi í cu'ucu'u. Ajta Dios pu tí'ijmícua a'ame. Aj pu 'i a'uun a'ará'a a'u ti caí é'e ja'ati, a'u ti ajta Dios rí'i tiyá'uruurijtze. A'uu pu á'ateeri a'achú cumu huaíca nine'ira'a japuan já'ita'a.

15 Aj pu 'i a'ín cu'ucu'u jeíhua jaj aijxíre án ruténe'etze'e tí'ij ya'ujaújte'en, ajta rá'ujamiste'en a'íjna í 'íta'a.

16 Ajta a'ín í chuej, a'í pu raatévai a'íjna jime'e ti a'utátzi'ite tí'ij ateárute í jaj, í ti ra'ijxíre í cu'ucu'u án ruténe'etze'e.

17 Aj pu 'i a'ín cu'ucu'u raatájaaxiejvi'irili a'íjna í 'íta'a. Ajta á'uraa. Aj pu 'i a'utéjche ti hua'uténe'usi'ite'en a'ímej í seica, í mej yaújmuame'en pú'een a'íjna í 'íta'a. A'ii mú a'ín pú'een í mej miyen rá'astijre'e a'ij ti tihuá'ajte'e í Dios, í mej majta te'anxájta me'íjna jime'e í Jesús.

13

Jíme'en í mej hua'apua í mej majta huápi'i á'atesi'ire'e seijre'e

¹ Ajta a'ín í cu'ucu'u, a'íi pu a'uun a'utéechaxi ja'apuaíri japua, a'u ti e'eve'e'ástime í jaj ti ve'ée.

Net'íj ni ja'ati ti huápi'i á'atesi'ire'e huasej. A'íi pu í jaj tzajta'a ti ve'ée a'itamé'eca'a. Tamuáamuata'a pua'améca pu ave'ehuájme, ajta arahua'apuáca huíjmu'uu. Curuun pu te'uteárújti'ihuaca'a í ru'e'ehuáj jetze seij ajta seij, ajta ayée pu té'eyu'usi'i a'íjna jetze í mu'úra'an a'ij ti ántehuaa ti a'ij pua'a namuajre'e í Dios jemi.

² Ayee pu seijre'eca'a a'íjna í ti'iti í nej raasej. Ayee pu éene'e seijre'eca'a tíj jíripu. Ayee pu éene'e ti'ícajme tíj juutze'e. Ayee pu ajta 'een anténi tíj muajye. Ajta a'ín í cu'ucu'u, a'íi pu nain raatátui a'íjna í ti'iti í rumuári'eri'ire'ara'an, ajta tíj na'a ti jín tí'ajta, ajta í ti jín jeíhua antiújmua'aree.

³ Cu xiee ti'ípuaíjti'ihuaca'a seij í mu'úra'an tí'ij huámi'ini. Ajta, ajtahua'a pu huarúj a'íjna í ti ti'ípuaíjti'ihuaca'a. A'íj pu jín naíjmi'i matíj mena'a mej yen huachéjme íiyen chaanaca japua, jé'ecan mú rí'i tira'utasej, majta ra'ará'astijre me'íjna í ti'iti.

⁴ Majta me'ín í teteca, a'íi mú raateánajcheca'a me'íjna í cu'ucu'u a'iné pu'uri a'ín cu'ucu'u raatátui a'íjna í ti'iti ti huápi'i á'atesi'ire'e í ti jín antiújmua'aree. Majta me'ín teite raateánajcheca'a me'íjna í ti'iti. Ayee mú tíjín:

—¿A'ataani ayén 'een tíj amijna mi ti'iti?
¿A'iné auj tí'iri'iri ti ja'ati raaténe'usi'ite'en ti ij

raatémua'itín? Capu xaa ne'u ja'ati. —Ayee mú tiu'utaxájtaca'a.

⁵ Ca'aníjra'a pu raatá'a tí'ij á'ujtzaahuat'e huápi'i í Dios jemi. Ayee pu tiraatá'a tí ayén á'ateevi'in tí a'íjna jín antiújmua'areere tí jeíhua huápi'i a'ij pua'a tí'ixajta. Ayee pu á'ateere a'achú cumu hua'apuate máxcira'i japuan hua'apua.

⁶ Aj pu 'i a'utéjche tí a'ij pua'a tí'ixajta í Dios jemi a'íjna jime'e tí rusej ayén huaújruu tíj í Dios. Jé'ecan pu a'ij pua'a tirá'ixaa a'íjna í Dios, ajta a'ímej í mej a'uun é'eseijre'e í Dios jemi u ta japua. A'íí mú tí'ivaire'e matj chí'ira'an í tí tzajta'an seijre'e í Dios.

⁷ Ajta a'íín í cu'ucu'u, a'íí pu ca'aníjra'a raatá'a tí'ij hua'uténe'usi'ite'en a'ímej í mej rí'í tí'iteseijre'e í Dios jemi. Ajta ayén tiraatá'a tí'ij hua'utémuaitín. Ayee pu ajta tiraatá'a tí a'íjna jín antiújmua'areere tí'ij tíhua'uta'aíjte'en matj mena'a pua'amé yen seijre'e íiyen chaanaca japua, a'ííme teitejra'a, matj mena'a mej seij jetze airájneijte majta a'ííme í mej seij chuéjra'a japua é'eme'ecan, tíj na'a í tí seijre'e í hua'aniuuca.

⁸ Matj mena'a pua'amé íiyen huachéjme í chaanaca japua, a'íí mú raná'amiche'e muá'aju'u, matj mena'a í mej caí é'eyu'usi'ihuaca'a í yu'uxari jetze í tí ra'áa a'íjna í Cáne'a í tí huamé'ere tí'ij caí xi huataseijre í chaanaca. A'íjna í yu'uxari, a'íí pu a'íín pú'een tí jetzen té'eyu'usi'i a'íj tí ántehuaa seij ajta seij matj mena'a pua'amé ruuri huateáturaa jemin í Cáne'a tíj na'a rusén jime'e.

⁹ Tí pua'a ja'ati huíteájnamua, ché'e a'íín temua'a naa tiráanamua.

10 Ti pua'a píti'ihuájxi'epi'intare'en, mej se'ij hu-ateví'iran mej ra'iteáanan, a'íí mú xaa raatévi'ira. Ti pua'a ja'ati titéecui'ini chun jime'e, ayée pu tiú'ujxe'eve'e ti ayén che'atá a'íjna jín tiú'umi'ini. Ayee pu Dios ayén tihua'utajé a'ímej í mej rí'í tí'iteseijre'e í jemin mej mi te'utáviicua'i, mej mi majta rá'atzaahuat'e.

11 Net'íj ni se'ij huase'ij í ti'iti ti a'itanej á chuaata'a. Hua'apuaca pu ave'ehuájmee t'ij cáne'a. Ayee pu ajta tí'ixaxa'a t'ij í cu'ucu'u.

12 A'íí pu ra'ará'astijre a'íjna jetze me'ecan í ti'iti í ta'amuájca t'ij na'a í ti jín antiújmua'aree. Ayee pu ca'anéeri jín tihua'a'ijte'e mat'ij mena'a mej íiyen seijre'e chaanaca japua mej mi raateánajche me'íjna í ta'amuájca ti huarúj í ti ti'ipua'íjti'ihuaca'a a'íjna jime'e í ti huam'íi.

13 Ayee pu tí'imijhuaca a'íjna í ti ravaire'e mej mi ti'itij jín rí'í tira'utase'ij. Jee xaa, ne'u, ayée pu tiraayí'iti ti taij u e'icájrieni u júte'e, mejseíraca'a í teite.

14 A'íí pu huá'acuanamua í teite í mej yen seijre'e íiyen chaanaca japua a'íjna jime'e ti ca'aníjra'a ratá'aca ti ayén huárini a'íjna jetze me'ecan í ta'amuájca. Aj pu 'i ayén tihua'u'íjca mej mi ratetáahuan ti'iti tévira'a ti ayén seijre'e t'ij a'íjna í ti'iti ta'amuájca, a'íjna í ti tiu'upuá'íjti'ihuaca'a a'íjna jime'e í chun, ajta a'íjna í ti'iti ti huarúj.

15 Ajta a'íin í ta'amuájca, ayée pu ajta tiraatá'a a'íjna í ti ravaire'e t'í'ij xiéjniu'ucari raatátisten a'íjna í ti'iti tévira'a t'í'ij tiu'utaxáj. Ayee pu ajta tiraatá'a ti a'íjna jín antiújmua'areere ti ayén tihua'uta'a'íjte'en mej raajé'ica ja'ati ti na'a í ti caí á'ujca'ane ti raateánajche a'íjna í ti'iti tévira'a.

16 A'ñi pu ajta tihuá'aijte'e mej mi anaújyu'uxaxi'in í rumuájca'a jetze na'ari mej araujyú'uxaxi'in í rucuaatzi jetze naíjmi'i í teite. Capu tíhua'utá'uuni'ira ti pua'a ja'ati ayén cálieen jín ti'itéjvee nusu ve'ecán jín ti'itéjvee, ti pua'a chíjteaani pú'leen nusu caí a'ij tí'ijviicua'i. Capu ajta ti pua'a miyen ruxiéehua á'ujujhua'ane'en na'ari mej ca'anéri jín tí'imuari'e.

17 Ti pua'a caí ja'ati é'eyu'usi'ihua a'ij ti ántehuaa a'ijna í ti'iti na'ari í ti jín tí'itiej, capu rí'iríista a'ame ti a'ijna í ja'ati ti'iti huánanan. Capu ajta rí'iríista a'ame ti ti'iti huátuaani.

18 A'ij pu jín, ayén tiú'ujxe'eve'e ti ja'ati rí'i mé teuúmua'aree. Ché'e a'ñn yaú'itiée á'ara'ani a'ij ti huataújmua'a a'ijna í ti jín tí'itiej a'ij ti ántehuaa a'ijna í ti'iti. A'ijna í ti jín tí'itiej, a'úu pu a'uvé'emej a'imej tzajta'a í teteca. Ayee pu tí'itiej a'achú arájsevi sieentu japuan huaícate japuan arájsevi.

14

Jíme'en í mej mu'íi mej jéjcuacan jín ti'ichuúica

1 Netí'ij ni atáneereca'a. ¡Me'ecui xaa! An pu huatéveeca'a a'ijna í Cáne'a jirí japua í ti ayén téja'arájtehuaa tijín Sión. A'ñi mú majta jamuan me'ánna huaté'uuca í mej anxíte japuan hua'apuate japuan muáacua ví'ira'a ará'ase. Ayee pu té'eyu'usi'ihuaca'a aj huá'acuaatze'e a'ij ti ántehuaa a'ijna í Cáne'a, ajta a'ij ti ántehuaa a'ijna í ti rájya'upua.

2 Netí'ij ni ráanamujri'i ti ja'ati u ta japua teja'utaxájtaca'a. Ayee pu namuajre'eca'a tíj jaj ti sihuájna ca'anín. Ayee pu ajta namuajre'eca'a

matíj mej téniuuca'an huápil'i. Ajta í niuucari í ti jín tiu'utaxájtaca'a, ayée pu namuajre'eca'a matíj a'íime í mej tí'icuiina a'íjna jetze í aarpa.

³ Majta miyen tí'ichuiicaca'a seíj jíme'e í chui-icari í ti jécua a'íjna jemi í Dios, majta a'ímej jemi í mej muáacua í mej ruuri, majta a'ímej jemi í vaujsi í mej seité japuan muáacua ará'ase. Capu ja'ati raayí'tihua'a ti tiu'utáchuiica a'íjna jíme'e í chui-icari sino a'í mu'u í mej anxíte japuan hua'apuate japuan muáacua vi'ira'a ará'ase, í ti a'íin Cáne'a tiu'unájchitaca'a í mej jíme'en té'echa'íica'a í Dios jemi. Matí'ij mi mauj iyá'ujujhua'ane'en íiyen chaanaca japua.

⁴ A'ii mú a'íin pú'een í mej caí ti'ihuaújxana'acire 'úucate jemi a'íné a'í mú urarí'ene'eca jín á'ujujhua'ane'e. A'ii mú a'íin pú'een í mej miyen á'ujujhua'ane'e a'íjna jamuan í Cáne'a a'u ti na'a ti á'ume. A'í pu hua'irájtuaa huá'a tzajta'a a'ímej í mej yen seijre'e íiyen chaanaca japua. Ajta a'íin í Cáne'a, a'í pu ayén che'atá na'a huávi'itiste'esin í Dios jemi tíj ja'ati tiu'utátuiire'esin í Dios jemi a'íjna í'iciri ti amuacá ajtanéj. Jamuan í Dios, a'í pu ajta hua'ancuré'evi'iti.

⁵ Ajta a'íime, camu a'atzu tí'ihua'itaca, sino temua'a mú urarí'ene'en seijre'e í Dios jemi.

A'ij mej tiu'utaxájtaca'a í mej huaíca í mej tí'ivaire'e u ta japua

⁶ Netí'ij ni seíj huaseíj ti ta japua tí'ivaire'e. Júte'e pu rá'ara'aca'a tí'ij tihua'utá'ixaate'en í niuucari í mej jín huataújtemua'ave'en matíj mej na'a rusén jíme'e. A'í pu rá'ara'aca'a tí'ij tihua'utá'ixaate'en matíj mena'a pua'amé yen huachéjme i chaanaca

japua, matíj mena'a pua'amé í mej seij chuéjra'a japua é'eme'ecan, matíj mena'a pua'amé me'ín pú'een í teite, matíj mena'a pua'amé í me'ín pú'een í teitestemua'ame'en, majta naíjmi'i a'ímej í mej seicié tí'ixaxa'a.

⁷ Aj pu 'i ca'anín jín ayén tiu'utaxájtaca'a tijín:

—Setá'aj rá'atese'e í Dios, setá'aj seajta rí'i tiraateájtuaani a'iné pu'uri ayén teja'uré'ene a'ájna ti jetzen Dios huá'axijte'en naíjmi'íca í teite. Setá'aj raná'amiche'en a'íjna ti raatétaahuaca'a í ta japua, ajta í chaanaca, ajta í jaj ti ve'ée, ajta a'u ti na'a ti huajaíxavi'ijmee.

⁸ Aj pu 'i seij ti tí'ivaire'e u ta japua í ti hua'apua, a'í pu cujta'an tiu'uxájtajme'e. Ayen tijín:

Single Line Comp —Pu'uri á'ave. Nain pu jín á'ave a'íjna í Babilonia a'íjna í ti hua'utétimua'iraste a'íjna jime'e ti huá'a jamuan huateújxana'acire matíj mena'a pua'amé seij chuéjra'a japua é'eme'ecantaca'a. Dios pu ajta raatétimua'iraste'esin a'íjna jime'e ti huápi'i niu'ucami'i.

⁹⁻¹⁰ Aj pu 'i seij ti ta japua tí'ivaire'e, a'íjna í ti huaíca, a'í pu ajta cujta'an tiu'uxájtajme'e ca'anín jime'e tijín:

—Ti pua'a hui ja'ati raná'amiche'en a'íjna í tevi ti huápi'i á'atesi'ire'e, ajta a'íjna í tevi, ajta ayén tira'utéca'anen mej rá'usiimua'an í cuaatzeájra'an jetze nusu muájca'are'ara'an jetze a'ij ti ántehuaa a'íjna í til'iti í ti huápi'i á'atesi'ire'e, Dios pu ajta raatétimua'iraste'esin a'íjna jime'e ti huápi'i niu'ucami'i. Ajta a'ín í ja'ati, til'iti pu hui antí'isin ti ayén ráaruuren tíj a'íjna í huá'ave'eri ti caí til'iti

ranaxca, í mej jín huá'acuí'lica. A'í pu ajta rajpuaítzi a'ame í taij jime'e, ajta a'íjna jime'e ti ayén té'eeca t́j tepúusti'i. Ayee pu hui tirajpuaítzi a'ame huá'a jemi í mej ta japua tí'ivaire'e, ajta a'íjna jemi í Cáne'a.

11 'Ajta a'ín í citzij ti ájcitziu a'íjna jime'e í mej jín rajpuaítzi, ayée pu hui á'ateeri t́j na'a rusén jime'e ti ajcitziúuta a'ame. Capu ajta hua'atá'aca mej huaújse'upe'en tújca'ari tzajta'a nusu t́ca'ari tzajta'a. Ayee mú hui tirajpuaítzi muá'aju'u a'íme í mej rana'amiche me'íjna í ti'itij, ajta í teví, mat́j mena'a mej miyen ra'ancuré'a í mej jín huá'a jetze ra'uyú'uxa a'ij ti ántehuaa a'íjna í ti'iti.

12 'A'í pu jín, Dios ayén tihuá'ajee a'ímej í mej r'í'í tí'iteseijre'e í jemin mej mi te'utávii'cua'i, a'ímej í mej rá'astijre'e a'ij ti tiu'uta'a'íjtaca'a í Dios, a'ímej í mej majta rá'atzaahuate'e me'íjna í Jesús.

13 Net'íj ni ráanamujri'i ti ja'ati júte'e teje'icáxajtaca'a. Ayee pu tinaatá'ixaa t́jín:

—Patá'aj piyen tira'utéeyu'uxa yee: “T́j na'a ti yú auca'ití a'ame, miché'e r'í'í titeújmuajte'e a'íme í mej rá'atzaahuate'e í tavástara'a.” Ajta a'ín í xiéjniu'ucare'ara'an í Dios, ayén t́jín: “Jee xaa ne'u, r'í'í pu Dios tihua'utá'a a'iné pu'uri r'í'iri mej huaújse'upe'en, mej mi caí ché'e ti'iti jín á'aviicua'ire'e, a'iné pu'uri tihua'uc'í'í í mej raa-muá'iti me'íjna jime'e mej tiu'umuá'iej.”

I ti chuej japua tiú'uc're

14 Net'íj ni neajtahua'a atáneereca'a. ¡Me'ecui xaa! A'í nu huasej í jait'iri ti cuaiina. Seij pu ajta a'ín japuan újcatii ti ayén seijre'eca'a t́j teáata'a. A'í pu curuun uteárujte'ecaa ti oro

jín taavíjhuaca'a, ajta ru'itéchueeca'a rurí'írínta'a pújme'en í chun ti aicaújtuta ti ajta temua'a naa te'entámíimi.

15 Aj pu 'i seij ti ta japua tí'ivaire'e a'uun a'irájraa u teyujta'a. A'íi pu ca'anín jín ayén tiraatajé a'íjna ti jaitiri japua án á'ujcatii tijín:

—Patá'aj hui mi chun jín raaré'eveijche í ti ari tí'icire, patá'aj tiu'uré'atzaana, a'iné pu'uri a'ájna teja'uré'ene í pej jetzen tiu'uré'atzaana. Pu'uri hui jeíhua tí'icire, ajta ari huaré'eca'anaca'a í chaanaca japua.

16 Ajta a'ín í ti jaitiri japua án á'ujcatii, a'íi pu ca'anín jín tiu'uré'eveijcheca'a í chaanaca japua, ajta tiu'uré'etzaj tij na'a ti tiú'ucíreca'a.

17 Aj pu 'i seij ti ta japua tí'ivaire'e ajta a'uun e'irájraa u teyujta'a. A'íi pu ajta ru'itéchueeca'a seij í chun ti aicaújtuta, ti ajta temua'a naa te'entámíimi.

18 Aj pu 'i seij ti ta japua tí'ivaire'e, a'uun e'irájraa a'u ti a'utéjvee a'íjna í mej japuan tí'imuai'ivajtaca. A'ii pu a'ín pú'een í ti a'íjna jín antiújmua'aree í taij jime'e. Aj pu 'i ayén tiraatajé a'íjna í ti ru'itéchueeca'a í chun ti aicaújtuta, ti ajta antámíimi. Ayen tijín:

—Patá'aj hui raaré'eveijche, pajta rájseire'en í táca'ira'an í pi'ista ti a'uun a'uvéjme í chaanaca japua a'iné pu'uri cuasi a'íjna í uuva.

19 Jíme'en pu'u ayén tiraata'ixaa, aj pu 'i a'ín ayén raaré'eveijcheca'a í chaanaca japua, ajta rájseij a'íjna í ti tiú'ucíreca'a í chaanaca japua. Aj pu 'i a'uun ya'ucáhua'axi a'íjna tzajta'a í mej jín rajaachi í uuva a'u ti Dios ya'ujáche a'íjna jime'e ti huápi'i niu'ucami'i.

²⁰ Aa mú ya'ujáche á pua'acié á chajta'a. Xúure'e pu airámi'iyeca'a a'íjna í mej rá'ajache. Temua'a pu te'utí'i já'araa. Ayee pu te'utí'i a'utí imuá a'atá'ase í xáachime'ara'an jetze í cahuaayu'u. Ajta, ayée pu a'uyaúcan japua huami'iyéjraa a'achú cumu huaíca ciento kilómetros.

15

A'íime í mej ta japua tí'ivaire'e, ajta í puaíjtzi ti aráhua'apua

¹ Netí'ij ni neajtahua'a seíj huaseíj í ti ta japua jeíhua ruxe'eve'e. Jé'ecan nu rí'i tira'utaseíj. A'ii mú a'ín pú'een í mej tí'ivaire'e u ta japua, í mej aráhua'apua ará'ase. A'íj mú jín antiújmua'aree me'íjna jime'e í puaíjtzi í ti ayén ará'ase a'achú cumu aráhua'apua. A'ii pu a'ín pú'een í ti nain jín te'entipúa'ajte í ti jíme'en Dios ayén puaíjtzi hua'utá'asin a'íjna jime'e ti huápi'i niu'ucami'i.

² Netí'ij ni til'iti huaseíj. Naa pu tí'imesti. Aa pu a'umuáanijme'ecaa, cu xiee viidrio na'a, taij ti tzajta'an seijre'e. Majta a'íime í mej raatéemua'iti me'íjna í tevi ti huápi'i tési'ire'e, majta í tevi ti ravaire'e, majta í ti jín til'itiée á'aye'i í ti jín ayén ántehuaa, a'úu mú huaté'uuca'a a'utí e'leve'e'ástime a'íjna í viidrio ti amuáanijmee. A'íj mú te'it'é'í'ica'a rumuájca'a jetze me'íjna í aarpa ti Dios hua'utapuaíjve mej mi me'íjna jín tiu'utá'cuina í amín.

³ Majta miyen me'íjna jín tí'ichuiicaca'a me'íjna jime'e a'ij ti huaríj a'íjna í Moisés ti tí'ivaire'eca'a í Dios jemi, majta me'íjna jime'e a'ij ti huaríj í Cáne'a. Miyen tijín:

Jé'ecan pej huápi'i rí'i naa huaríj

patí'ij tu'irájtuaa mú'ee, tavástara'a,
mi pej Dios pú'een, pej pajta nain jín
antí'amua'aree.

A'ij tu jín rí'i te'utasej.

Tíj na'a a'ij pej rici, xí'epi'in pej rici,
pajta tzáahuati'ira'a jín raaxí'epi'intare'e,
mi pej piyen tí'ajta
tíj na'a ti yú auca'ití a'ame tíj na'a rusén jime'e.

⁴ Naími'i mú miyen rí'i timuaateájtuaani,
majta rí'i timuaatá'asin, mú'etzi,
mi pej tavástara'a pú'een,
a'iné mú'ee pej asej ri'éene'ecán jín seijre'e í Dios
jemi.

Naíjmi'i í mej seij chuéjra'a japua é'eme'ecan,
a'íi mú a'uvé'uju'u muá'aju'u mej mi
muaateánajche,
a'iné pepu'uri tíhua'utasejrate pej piyen xí'epi'in
huaríj a'ij ti tiraavíjate'e.

⁵ Netí'ij ni atáneereca'a ti pua'a ari te'entácuuni'i
u teyujta'a a'u ti e'irácatii a'íjna í ti te'anxájta a'íjna
jime'e í Dios.

⁶ Matí'ij mi me'uun a'iráaci u teyujta'a a'íime
í mej ta japua tí'ivaire'e í mej aráhua'apua
ará'ase. Mu'uri ráatisime'e í puaíjtzí í ti ajta
aráhua'apua ará'ase. Cíixuri mú majta tilitechée
ti mé'e tilitetáatiye'i temua'a naa. Majta mú
avé'ejí'ici'ihuajme'ecaa án rútaaviitze'e puaasi
jime'e ti oro jín taavíjhua.

⁷ Ajta seij í mej muáacua í mej ruuri, a'íi pu
hua'uré'e'í'ipi'ite a'íimej í mej aráhua'apua ará'ase
a'íjna í tuxa'a í ti avé'ejístijmee í ti jín huápi'i
niu'ucami'i í Dios í ti i'irúuri rusén jime'e. Seij ajta
seij pu hua'uré'e'í'ipi'ite a'íjna í tuxa'a.

⁸ Aj pu 'i temua'a téjcitziujtareca'a u teyujta'a a'íjna jime'e í muári'eri'ire'ara'an í Dios. Ajta, jeíhua pu huápi'i huatátzareajraa. Aj pu 'i temua'a te'uhuájisteca'a u teyujta'a a'íjna í citzij. Capu ché'e huatári'iristareca'a ti seij a'uun a'uteárute u teyujta'a ajta mena'a caí ra'antipué'ajte'en í mej aráhua'apua ará'ase mej puaíjtzi hua'utá'an í ti ajta aráhua'apua ará'ase.

16

I cutzape'e ti a'íjna jín avé'ejiste a'íjna jime'e ti Dios huápi'i niu'ucami'i

¹ Netí'ij ni seij huasej í ja'ati ti a'uun a'utéveeca'a u teyujta'a. Ti'iquí ca'anín jín tiu'utaxájtaca'a tíjn:

—Sericu, setá'aj hui á ya'ucáxire'en í chaanaca japua tíj na'a í ti avé'ejisti í cutzape'e jetze í ti aráhua'apua ará'ase mej mi ráamua'aree ti huápi'i niu'ucami'i í Dios.

² Jíme'en pu'u ayén tiu'utaxájtaca'a a'íjna, aj pu 'i seij u a'uvé'emej. Ti'iquí á ya'ucájrie í chaanaca japua í cutzape'e jetze ti aramuáacua. Aj pu 'i huá'a japua rájve a'íjna í ti jín i'icá'atzata í ti a'ij pua'a té'eecca, ajta í ti a'ij pua'a seijre'eca'a. Ayee pu tihuá'uruu a'ímej ti huá'a jetze té'eyu'usi'ihuaca'a a'ij ti ántehuaa a'íjna í ti'iti, majta a'ímej í mej raateánajcheca'a.

³ Ajta, í ti hua'apua, a'íi pu ajta á ya'ucájrie í cutzape'e í ti aramuáacua japuan í jaj ti ve'ée. Jíme'en pu'u ayén huaríj, aj pu 'i seicié huaújruu í jaj tíj xúure'e ti airámi'iyeca'a tevi jetze ti huamí'i. Ajta, najjmi'i í mej jaj tzajta'a chejca'a, a'íi mú huácuii.

⁴ Ajta í ti huaíca, a'íi pu á ya'ucájríe a'íjna í seij í ti cutzape'e jetzen aramuáacua í játe'ana tzajta'a, ajta japuan a'u ti e'ejajxajme. Jíme'en pu'u ayén huaríj, tíj na'a ti tí'iseijre'e seicié pu huaújrúu tíj xúure'e.

⁵ Netí'ij ni ráanamujri'i í ti a'íjna jín antiújmua'aree í jaj, a'íi pu ayén tiu'utaxájtaca'a tíjín:

—Xí'epi'in pej hui huaríj pe'íjna jíme'e pej hua'uxíjte, mú'ee, mi pej jéjcua imuá seijre'eca'a, pajta íjii pej pauj seijre'e.

⁶ 'Naa pu hui xí'epi'in a'iné a'íime í teteca mu'uri huá'ucuii a'ímej í mej mú'etzi jemi r'íi tí'iteseijre'e, majta a'ímej í mej mú'etzi jetze me'ecan tí'ixaxa'ata'a. A'íj pej jín peri hua'utá'a mej majta xúure'e huayé'en. Ayee mú hui éeni'ici'e ra'antimuá'iti.

⁷ Netí'ij ni ráanamujri'i ti ja'ati ti a'uun a'utéveeca'a jetzen a'u mej tejé'emuai'ivajtaca. Ayee pu tiu'utaxájtaca'a tíjín:

—Jee xaa ne'u, tavástar'a, mi pej Dios pú'een, mi pej hui pajta nain jín antí'amua'aree. Tzáahuati'ira'a pej jín huá'axijte'e. Naa pu tiraavíjte'e a'ij pej tihua'utá'a.

⁸ Ajta í ti muáacua, a'íi pu á ya'ucájríe í cutzape'e a'íjna japua í xicaj. Ajta ayén tiraatá'a a'íjna í xicaj ti huá'uta'ixi'iri.

⁹ Majta a'íime í teteca, huá'ataixi'i a'íjna jíme'e ti huápi'i téjxicaca'a. Majta a'ij pua'a tiraatajé í Dios í ti a'íjna jín antiújmua'aree ti puaíjtzi hua'atá'aca. Camu raatéxiehuataca'a a'íjna ti a'ij pua'a een a'ij mej ríci, camu majta r'íi tiraatá'a í Dios.

10 Ajta í te'anxívi, a'íi pu ajta á ya'ucájríe a'íjna í cutzape'e a'íjna japua a'u ti e'ecájca a'íjna í tí'iti ti a'ij pua'a een. Jíme'en pu'u ayén huaríj, huápi'i pu huateática'areca'a a'u ti tejé'aijta. Majta a'íime í teteca, a'íi mú avá'ujche'eve'e í runeanu jetze me'íjna jíme'e mej jeíhua huápi'i rajpuaíjtzica'a.

11 Majta jeíhua mú a'ij pua'a tiraatajé me'íjna í Dios í ti ta japua é'eseijre'e me'íjna jíme'e mej jeíhua huápi'i rajpuaíjtzica'a. Camu majta a'atzu raatéxiehuataca'a a'ij mej rijcaa ti a'ij pua'a een.

12 Ajta í ti arájsevi, a'íi pu ajta á ya'ucájríe í cutzape'e a'íjna japua í játe'ana í ti ve'ée ti ayén téja'arájtehuaa tíjín Eufrates. Jíme'en pu'u ayén huaríj, aj pu 'i nainjapua ateáxi'i í játe'ana. Ayee pu 'een jín ateáxi'i mej mi antáciíne a'íime í mej tí'aijta a'u ti 'eíjninei í xicaj.

13 Net'íj ni hua'useíj í mej huaíca í mej aijneájxi huá'ateni'itze'e a'íjna í cu'ucu'u, ajta a'íjna í tí'iti ti a'ij pua'a een, ajta a'íjna ti huá'a jetze me'ecan tí'ixaxa'a hua'itzi jíme'e. Ayee mú seijre'eca'a matíj teecujse. A'ii mú a'íin pú'een í xiéjniu'ucari í mej a'ij pua'a 'een.

14 A'ii mú majta a'íin pú'een í xiéjniu'ucari í mej tiyaaru'u jetze ajtémecan. A'íi mú á'ujujhua'an nainjapua í chaanaca mej mi huá'ajseire'en a'íimej í mej tí'aijta íiyen chaanaca japua mej mi huaténe'use'en a'íjna xicáara'an ti huápi'i ruxe'eve'e tí'ij a'íin huataseíjre'en í Dios ti nain jín antiújmua'aree.

15 Ayee pu tíjín: “Me'ecui xaa, yee nu hui uvé'enejsin tíj nahua'ari ti avíitzi jín a'uteáru'ipi í huá'a chí'ita. R'íi pu tiraatá'a a'íjna ti a'atánee, ajta

jín tí'téechen tí'ij caí mua'avi'í á'u'che'ecane'en, mejsei'ra í teite í tí jín tí'itevi'ira'a." Ayee pu tiu'utaxájtaca'a.

16 Majta a'íime í mej huaíca, a'úu mú huá'ajseij a'ujna já'ahua'a tí ayén téja'arájtehuua hua'aniuuca jíime'e í hebreos tíjín Armagedón.

17 Ajta í tí aráhua'apua, a'íi pu á ya'ucájríe í cutzape'e. Jíme'en pu'u ayén huaríj, aj pu 'í seij ca'anín jín tiu'utaxájtaca'a tí a'uun a'utéveeca'a teyujta'a. A'ujna, a'u tí a'utéjvee í mej japuan tí'imua'i'ivajtaca, ayée pu tiu'utaxájtaca'a a'íjna tíjín:

—Pu'uri icu, antipúa'areca'a.

18 Matí'ij mí huatémáxcava'axi, majta téniuuca'a. Jéihua pu ajta tí'ica'arajna'a. Ajta jé'ecan huápi'i huateújca'atzijxi í chaanaca. Tíj na'a tí yú e'iré'ene mej yen huatasejre í teteca íiyen chaanaca japua, capu ja'anáj ayén huateújca'atzijxi. Jé'ecan pu huápi'i xaa huateújca'atzijxi.

19 Ajta a'íjna í chajta'a í tí ve'ée, huaíca pu autátzi'iteca'a. Ajta é'evatzijxi í huá'achajta'a í mej seij chuéjra'a japua é'eme'ecan. A'íi pu Dios, ajta ra'utámua'areeri'í a'ujna u Babilonia tí'ij puaíjtzí raatá'an tí'ij tí'iraci'ítí í tí jín huápi'i níu'ucami'i í Dios.

20 Ajta tíj na'a a'u tí e'eráhuachi í jaj tzajta'a, a'íi pu e'ehuaújpua'arixi. Capu ajta ché'e seijre'eca'a a'u tí á'ujírime.

21 Majta mú tétej cáavatzí, temua'a mevive-jmé'e. Temua'a pu tíjetéjme'ecaa a'achú cumu huaícate kiilu. A'íimej pu japua rájve í teteca. Majta a'íime í teteca, a'íj mú pua'a tiraatajé me'íjna í Dios

me'íjna jime'e í téetej a'iné jeíhua mú rajpuaíjtica'a mej miyen cáavatzí í téetej.

17

Dios pu ra'ujxíjte a'íjna í 'íita'a tí rutuaaca'a

¹ Aj pu 'i seij tí ta japua tí'ivaire'e, tí ajta seíj huíteática'a í cutzape'e tí aráhua'apua ará'ase, a'íi pu mú a'uvé'emej, ajta ayén tinaatá'ixaa tíjín:

—Iiya'a jíi, nee nu muaataseíjrate'esin a'íjna tí jín Dios ra'uxíjte'en a'íjna í 'íita'a tí ve'ecán jín tí'itéveeca'a, tí ajta ramuá'itica'a í tumín í ruhuá'ira'a jime'e. A'ii pu a'ín pú'een í tí a'uun á'ujca í jaj japua tí ve'ée.

² 'Majta a'íime í mej tí'ajta íiyen chaanaca japua, a'íi mú huateújxana'acire me'íjna jamuan í 'íita'a. Majta a'íime í mej íiyen huachéjme chaanaca japua, a'íi mú majta huateájta'arua me'íjna jime'e tí a'ín 'íita'a ayén hua'utá'a mej majta jamuan tí'ihuajxana'acira'aten.

³ Aj pu 'i a'ín xiéjniu'ucare'ara'an í Dios, a'íi pu neja'uví'iti a'íjna a'u tí caí'é'e tí'iti. A'uu nu 'íita'a huaseíj tí a'íjna japua á'ujcatii í tí'iti tí pa'u. Ajta a'ín í tí'iti, jeíhua pu jetzen'éyuu'usi'ihuaca'a í tí jín ayén ántehuaaca'a, tí ajta jín a'ij pua'a tí'ijxa í Dios. Arahua'apuáca pu huíjmu'uu a'íjna í tí'iti, ajta tamuáamuata'a pua'améca ave'ehuájmee.

⁴ Tí'inacamua í tí tí'itéchen, ajta cíj caj tí'ipa'u. Jeíhua pu huápi'i ucárujti'ihuaca'a a'íjna í tí oro jín taavíjhua, ajta tetej tí huápi'i tí'ijnajche, ajta perla tí'iti. A'íi pu ajta ru'íteática'a í cutzape'e í tí oro jín taavíjhua. Ajta a'íjna jetze í cutzape'e,

ti'iti pu avé'ejisti í ti tiú'uxana'avi'iste'e, ajta í ti jín huateújxana'acire a'íjna í 'íita'a.

⁵ Ajta ayén té'eyu'usi'ihuaca'a í cuaatzeájra'an jetze a'ij ti ántehuaa.

Neajta inee, canu yaú'itiée na'araa ne'íjna í ni-uucari ti jetzen té'eyu'usi'ihuaca'a ti jíme'en yee: “Babilonia, í ti ve'ecán jín ti'itéjvee. Hua'ana'ana a'ímej í 'uuca í mej ramuá'itici í tumin í ruhuá'ira'a jíme'e. A'ii pu a'ín pú'een ti jetzen a'uun a'uvé'emej í ti tiú'uxana'avi'iste'e íiyen chaanaca japua.”

⁶ Net'íj ni raasej ti a'ín 'íita'a tahuáaca'a a'íjna jíme'e í hua'axuure'e a'íme í mej r'íi tí'itesejre'e í Dios jemi, majta a'íme í mej huácuihuaca'a me'íjna jíme'e mej rá'astijre'e me'íjna í Jesús. Jé'ecan nu a'ij te'utasej net'íj raasej.

⁷ Ajta a'ín í ti ta japua tí'ivaire'e, ayée pu tinaatá'ixaa tijn:

—¿A'iné 'een jín piyen te'utasej? Nee nu muaatá'ixaate'esin a'ij ti huataújmu'a'a a'íjna ti caí ámitieere'e a'íjna jíme'e í 'íita'a, ajta a'íjna í ti'iti ti japan avé'eca, í ti ajta arahua'apuáca huíjmu'uu, ajta ti tamuáamuata'a ave'ehuájmee.

⁸ 'A'ijna í ti'iti pej hui raasej, a'í pu ajm'íi huatasejre, ajta íjii, capu ché'e ye'e já'ahua'a. Ajta, aúche'e pu a'itaméj a'ujna a'utí e'etéecun ti caí a'ij ámitieere'e a'achú ti ucátee. Méjca'i huáyee pu ajta á'apua'aren a'íjna í ti'iti. Majta a'íme í mej yen huachéjme íiyen chaanaca japua, í mej caí é'eyu'usi'ihuaca'a a'íjna jetze í yu'uxari a'ij mej ántea'arua, a'íjna í yu'uxari ti jéjcuá imuá jetzen té'eyu'usi'ihuaca'a matíj mena'a pua'amé ruuri

huateáturaa í Dios jemi, ayée mú rí'i tiya'useíira muá'aju'u matí'ij raaseíj me'íjna í ti'iti a'ine a'íi pu ajmí'i huataseíjre, ajta a'ájná'imua í'iruurica'a, ajta caí ché'e mé iye'ahua'a. Ajta, aúche'e pu huataseíjre'esin.

9 'A'ijna í niuucari, ti hui ja'ati yaú'itiée á'ara'ani, ruxe'eve'e ti a'íjna jetze tiú'umua'ati temua'a naa. A'ijna í ti arahua'apua'ca huijmu'uu, ayée pu hui huataújmua'a tijín: A'ijna í jirí ti aráhua'apua ará'ase ti japuan á'ujca a'íjna í 'íita'a.

10 'A'íi mú majta a'íin pú'een í mej tí'aijta, í mej majta aráhua'apua ará'ase. Mua'anxívi í mej meri á'upua'areca'a. Seij pu'u auj ti'iti jín ti'itéjvee. Ajta í seij, capu xi seijre'e. Í ti ayén huataseíjre'esin, ayée pu hui tiú'ujxe'eve'e ti cíj na'a caj té'eteevi'in.

11 'Ajta, a'íin í ti'iti ti ajmí'i huataseíjre, ajta íjii capu ché'e ye'e já'ahua'a, a'ii pu a'íin pú'een í ta'aráhuaiica. A'íi pu ajta huá'a jetze ajtème'ecan a'ímej í mej aráhua'apua ará'ase. A'íi pu hui ajta á'apua'aren.

12 'Ajta a'íjna í ti tamuáamuata'a ave'ehuájmee, ayée pu hui huataújmua'a tijín tamuáamuata'a mú ará'ase í mej tí'aijta. Majta a'íime, camúu xi me'íjna jín tite'enteájrupi mej mi tiu'uta'aíjta. Maúche'e mú ra'ancuré'asin mej mi cíj mena'a caj tité'eteevi'in a'achú cumu seíj hora mej tiu'uta'aíjta jamuan í ti'iti.

13 'Naíjmi'i mú miyen ruxí'ej tí'imua'atze. Majta mej raatátuiire'en me'íjna í ti'itij matíj mena'a í mej jín antiújmua'aree, ajta í huá'amuarí'eri'ira'a.

14 A'íi mú hui raaténe'usi'ite'esin me'íjna í Cáne'a.

'Ajta a'ñin í Cáne'a, a'ñi pu hua'utémua'iti a'iné a'ii pu a'ñin pú'een í tavástara'a í ti ajta tihuá'aijte'e a'imej í ti hua'avásta'a pú'een í teite. A'ii pu hui ajta a'ñin pú'een í tajtuhuan ti naíjmi'ica tí'aijte'e í seica í tajtúhuaani. Majta a'ime í mej jemin seijre'e í Cáne'a, a'ii mú a'ñin pú'een í ti hua'utajé, ti ajta hua'antíhuau. A'ii mú majta a'ñin pú'een í mej caí até'itzea'ara í jemin.

15 Aj pu 'i ayén tinaatá'ixaa tijín:

—A'ijna í jaj ti ve'ée í pej hui raasej, í ti ajta japuan á'ujca a'ijna í 'íita'a ti ramuá'itici í tumin í ruhuá'ira'a jime'e, a'ii mú a'ñin pú'een í teitestemua'ame'en a'ijna í 'íita'a, majta í teitejra'an, majta í mej seij chuejra'a japua é'eme'ecan, í mej majta seij jín tí'ixaxa'a í niuucari.

16 'Ajta a'ijna ti tamuáamuata'a ave'ehuájme'e, í mej tí'aijta a'ijna jamuan í ti'iti, a'ñi mú rájcha'íre'e muá'aju'u me'ijna í 'íita'a ti ramuá'itici í tumin í ruhuá'ira'a jime'e. Majta hua'aré'e'itixi'isin í teite í mej rá'ajaahuate'eca'a. Majta ca'anéri jín tiracá'ari'ira tíj na'a í ti ti'itéchen. Majta raatéc'i'ime í huá'ire'ara'an. Majta ra'ateáaira.

17 'Ayee pu té'eme, a'iné Dios pu ayén ca'aníjra'a hua'utá'asín mej mi miyén tira'ará'astén a'ij ti a'ñin tí'ijxe'eve'e me'ijna jime'e mej ruxí'ej mena'a tiú'umua'ati. Majta raatátuiire'en í ti'iti jemi matíj mena'a ti'iti í mej jín antiújmua'aree. Ayee mú raruuren ajta na'a caí ayén te'araúrastén a'ij ti Dios ari tiraataxájtaca'a.

18 'Ajta, a'ijna í 'íita'a í pej raasej, a'ii pu a'ñin pú'een í chajta'a ti ve'ée í ti tihuá'aijte'e a'imej í tajtúhuaani í mej ti'iti jín títetateí a'u ti na'a íiyen

chaanaca japua. —Ayee pu tinaatá'ixaa a'íjna í ti ta japua tí'ivaire'e.

18

A'uu pu é'evatzijxi a'ujna u Babilonia

¹ Neajta seíj huaseíj í ti ta japua tí'ivaire'e. Aa pu ta japua ve'ecáme'ecaa a'íjna. Jéihua pu huápi'i tí'itij jín antiújmua'aree. Nain japua pu ajta huatátzareajraa íiyen chaanaca japua a'íjna jime'e ti tétaave'e á ru jetze.

² Aj pu 'i ca'anín jín huajíjhuaca'a ayén tijín:

—Pu'uri hui é'evatzijxi, pu'uri xaa hui é'evatzijxi a'ujna u Babilonia, í chajta'a ti vivéjme. Mu'uri hui me'uun a'uchéjme a'íime í tiyaaru'u. Pu'uri ajta huá'achi'i pú'een í xiéjniu'ucari í mej xána'avisí'i seijre'e. A'uu mú 'é'é á'aseca, matíj mena'a pua'amé í pina'ase í mej xána'avisí'i seijre'e, í tej caí a'atzu huá'axe'eve'e.

³ 'Ayee pu hui tiráaruu, a'iné a'íi pu ca'aníjra'a hua'utá'a matíj mena'a pua'amé í mej seij chuéjra'a japua é'eme'ecan mej mi miyen che'atá mena'a a'ij pua'a huárini tíj ajta huaríj a'íjna í Babilonia. A'íj pu hui jín Dios ayén che'atá na'a puaíjtzí tihua'utá'asin a'iné jé'ecan pu huápi'i niu'ucami'i a'íjna í Dios. A'íime í mej íiyen tí'ajta í chaanaca japua, matíj mena'a pua'amé jamuan huateújxana'acire. Majta a'íime í mej tí'ítua'araca íiyen chaanaca japua, a'íi mú hui meri huateújchijteaanitaca'a me'íjna jime'e mej jeíhua huápi'i tí'inecua'atzeca'a mej huápi'i tí'ijcha'íica a'íime. —Ayee pu tiu'utaxájtaca'a a'íjna í ti ta japua tí'ivaire'e.

4 Netí'ij ni sejí huánamuajri'i ti júte'e teje'icáxajtaca'a ayén tijín:

—Setá'aj hui se'uun huiráçine mi sej neteítestemua'a pú'een, sej si caí seajta siyen auté'itzen t́j a'íjna, ti ij caí puaíjtzi amuaatá'an í Dios a'ij ti a'ín raatá'asin a'íjna í 'íita'a.

5 'Jee xaa, a'íjna í ti j́n ayén huaríj, a'í pu hui ari nain j́n auteájturaa í Dios jemi. Pu'uri xáahuí ámitieere'e íjii u ta japua Dios ti é'eseijre'e. Ajta a'ín Dios, a'í pu ari ra'utámua'areeri'i t́j na'a ti j́n a'ij pua'a ti'itíújcha'íi.

6 'Ché'e ayén tí'iraci'ítí t́j ajta a'ín puaíjtzi ti-hua'utá'a í ti hua'utéemua'ítí. Ché'e ajta hui hua'apua tiu'utanájchita t́j na'a sejí jime'e ti ayén huaríj ti a'ij pua'a een. Ajta a'ín í vaasu ti jetzen raye'eca a'íjna ti j́n huateújtímua'ira, ché'e hui ayén ra'avé'ejisten a'íjna jime'e í ti hua'apua ará'ase í ti j́n huateátahuan.

7 'A'í pu hui ahuáujtzaahua rusejí, ajta huataújsejrataca'a a'íjna jime'e ti jeíhua huápi'i tí'ijcha'íica'a. Ché'e ruxí'ej na'a tiráaci'ítí tí'ij rajpuaítzi á'ara'ani, ajta ti huataújxieemiste'en. Ayee pu hui tilixa í ru tzajta'a tijín yee: “A'í pu a'íjna j́n tilítéjvee í 'íita'a ti tí'ajta, ajta ayén tijín ti caí ruseíjtaca'a, ti caí ja'anáj ruxieemíjte'e a'ame.”

8 'A'í pu hui j́n ca'anacan japuan rávajtzi sejí xicaj jime'e ti rajpuaítzi á'ara'ani. Aj pu xaa tíjcuí'ini, ajta ruxieemíjte'e a'ame. Ajta ayén tirajpuaítzi a'ame tujri jime'e. Ajta huateáta'iri'ihua, a'iné jeíhua pu raayí'ítí í rumuári'eri'ire'ara'an jime'e í tavástara'a, a'íjna í Dios ti ra'uxíjte'en.

—Ayee pu tiu'utaxájtaca'a a'íjna í ja'ati ti ta japua tí'ivaire'e.

⁹ Ajta a'íime í tajtúhuaani í mej tí'aijta íiyen chaanaca japua, í mej majta jamuan huateújxana'acire, majta jamuan huateújchijteaanitaca'a, matí'ij raaseíj a'utí'éjcitziu a'íjna jime'e ti teátaasin, a'íí mú ruyeinixi'ín, majta jíjhuan me'íjna jime'e í chajta'a.

¹⁰ Majta me'ín, á mú imuá a'uhuístira'asin me'íjna jime'e mej rátziine'e í ti jín rajpuaítzi a'ame. Ayee mú tí'ixáata muá'aju'u tíjín:

—Cui'i xaa, cui'i xaa, mú'ee mi hui pej chajta'a pú'een ti ve'ée, mi pej jeíhua tí'itij jín antí'amua'aree, mi pej hui Babilonia pú'een, seíj xicaj pu jín ayén teja'uré'ene ti Dios ma'uxíjte'e.

¹¹⁻¹² Majta a'íime í mej tí'itu'araca íiyen chaanaca japua, a'íí mú majta ruyeinixi'ín, majta ruxieemíjte'e muá'aju'u me'íjna jime'e í chajta'a a'iné capu ché'e mé'e ja'ati ti tihuá'unanai í mej tí'itua'araca tí'iti ti na'a mej tí'itici, ti pua'a oro, nusu plata, na'ari tetej ti temua'a tí'ijnajche, tí'iti perla. Majta seica cóxuri tí'itua'araca. Capu ché'e ja'ati tihuá'ananairan í ti tí'imesti, í ti nacamua, ti ta'atí, ti pa'u. Camu majta ché'e huá'ananaira muá'aju'u í cìyey mej tu'araca ti jeíhua tí'ijnajche na'ari tí'iti cobre nusu tepúusti'i nusu a'íjna í tetej í mej racaamete, í mej jín te'entámimite'en í tepuaij na'ari í chun.

¹³ Camu majta ché'e miyen tihuá'ananairan í mej cua'ira tíjnájchite'en tí'iti tzencá, na'ari tí'iti ti na'a ti naa té'eeca nusu cuaane'e na'ari tí'iti mirra, na'ari cuaane'e ti cuaiina, tí'iti nahuáj,

na'ari aceite, na'ari hariina ti r'len, til'iti tri-
igu, ajta ye'emuaate mej seijre'e huácacasi, na'ari
cáne'axi, ajta cahuaayu'u. Ajta, a'ijna í carreta
mej ru'uve'ejápuaj muá'aye'i í cahuaayu'u, majta
a'imej í mej ca'anéri jín tí'imuari'e ruxí'ej teite
jemi, camu mi ché'e tihuá'ananairan.

14 Ayee pu teja'uré'ene a'ij ti ajmí'i
té'eyu'usi'ihuaca'a ayén tijín: “A'ijna ti temua'a
tí'irí'een, í pej huápi'i raxí'eve'eca'a, capu ché'e
seíre'e a'ame mú'eetzi jemi. Ajta, naíjmi'i tíj na'a
ti huápi'i tí'ijnajche, ajta ti naa seijre'e í pej jín
á'atzaahuate'e asej, pepu'uri tejá'urie. Capej
ché'e tí'ite'uuni.”

15 Majta a'ime í mej tí'itu'araca, í mej
majta me'ijna jín huateújchijteaanitaca'a me'ijna
jime'e mej tihuá'ananairaca'a, a'ii mú a'imuá
huahuístira'asin, me'ijna jime'e mej rátziiine'e
muá'aju'u ti Dios puajtzi raatá'a. Maújyeinixi'in,
majta ca'anín jín huataújxieemiste'esin.

16 Ayee mú tí'ixáata muá'aju'u tijín:

—Cui'i xaa, cui'i xaa, mú'ee pej chajta'a pú'een,
ti ve'éé, í pej pe'ijna tí'itéchejca'a í ti mesti ti naa
'een, pajta pe'ijna jime'e ti nacamua, pajta í ti
pa'u jime'e, í pej ucá'arujti'iri'i pe'ijna í ti oro
jín taavíjhua, pajta pe'ijna jime'e í tetej ti huápi'i
tí'ijnajche, pajta pe'ijna jime'e í perla tí'iti.

17 'Sej hora pu hui jín, naíjmi'i tiu'uré'axi tíj na'a
ti huápi'i tí'ijnajcheca'a.

Majta a'ime í mej ramíjhuaca me'ijna í baarcu,
majta a'ime í mej tí'imijhuaca me'ijna jetze í
baarcu í mej'éeciine í jaj japua, majta naíjmi'i í mej
hua'ité vivi'i, a'úu mú imuá huahuístira'a.

18 Matí'ij raasej me'íjna í citzij ti ajtí'imua ájcitziujtaca'a, ti té'ajtaiira í chajta'a, matí'ij mi huateúyjeineajraa. Miyen tijín:

—¿Tí'itájni máa chajta'a seijre'eca'a tíj amijna? Capu hui mé'e é'e chajta'a.

19 Matí'ij mi tí'iti avá'ujratziiraxi tí'iti ti muini í rumu'úu jetze, mej ruyein, majta ruxieemíjte'e. Ayee mú tí'itejijhuaca'a tijín:

—Cui'i xaa, cui'i xaa, mú'ee hui chajta'a ti ve'ée, a'iné mú'eetzi mú jetze huateújchijteaanitaca'a matíj mena'a pua'amé mej tihua'a'ajte'eca'a a'ímej í mej baarcu jetze antaci'ica í jaj japua. A'í mú hui jín huateújchijteaanitaca'a me'íjna jime'e pej jeíhua huápi'i tí'ijcha'íica'a. —Ayee mú tiu'utaxájtaca'a a'íime í teite.

20 Seajta mú'een, mi sej ta japua é'eseijre'e, setá'aj huataújtemua'ave'en, seajta mú'een, mi sej rí'i tí'iteseijre'e í Dios jemi, seajta mú'een, mi ti Dios amua'antíhua'u, sej sí'i tihua'utá'ixaate'en í teite, seajta mú'een, mi sej Dios jetze me'ecan tí'ixaxa'ata'a. Setá'aj huataújtemua'ave'en se'íjna jime'e ti Dios ayén tejámuaaxí'epi'íntari'iri'i a'íjna jime'e ti ra'uxájte a'íjna í 'íta'a.

21 Aj pu 'i sej ti ta japua tí'livaire'e, ti ajta jeíhua huápi'i ruca'ané, a'í pu tetej ájtíi ti ayén seijre'eca'a tíj a'íjna í mej jín te'á'atí'ixica. Aj pu 'i ra'ateájríe í jaj tzajta'a ti ve'ée. Ayee pu tiu'utaxájtaca'a tijín:

—Ayee pu hui che'atá na'a éeni'ici'e raaté'uuna a'íjna í chajta'a ti ve'ée, ti ayén téja'arájtehuaa tijín Babilonia. Capu ché'e mé'e é'e seíre'e a'ame.

22 'Camu ché'e miyen namuáare'e muá'aju'u a'íime í mej tí'icuinaca a'íjna jetze í aarpa nusu

a'ñime í mej tí'icuinaca ruchiucari jime'e. Camu hui majta namuáare'e muá'aju'u mú'ejmi jemi a'ñime í mej tí'ic'i'isite'e c'í'isiti'ira'a jetze na'ari a'ñime í mej ucáaji'ihua muá'aye'i í trompeeta jetze. Majta a'ñime í mej tí'imijhuaca, mat'ij mena'a pua'améca, a'ij mej mena'a tiraay'í'ti, camu hui ché'e mú'ejmi jemi seíre'e muá'aju'u. Camu xaa ne'u a'atzu. Camu majta ché'e namuáare'e muá'aju'u a'ñime í mej té'atixica.

²³ 'Ajta, capu hui ché'e a'atáa a'ame mú'ejmi jemi í taij ti huatátza á'aye'i í huá'achi'i tzajta'a. Capu ajta ché'e ayén namuáare'e a'ame mej xahuaani'i jín tiu'utaxáj a'ñime í mej mauchén huanéjne'icheca'a, ajta mej mauchén huáviiche, a'iné a'ñime í mej mú'ejmi jemi tí'itu'araca'a, a'ii mú' me'ín pú'eene'e í mej yen japuan seijre'eca'a í chaanaca, í mej majta vivejme'en jín títetaté'eca'a. Pajta piyen tihúa'ucuanamua mat'ij mena'a pua'amé í mej seij chuéjra'a japua é'eme'ecan pe'íjna jime'e pej piyen huatá'aseijrataca'a pej huápi'i naa seijre'e a'ñimej jemi mej mi miyen huárini ti a'ij pua'a een í Dios jemi.

²⁴ A'ii pu ajta a'ñin pú'een ti huá'ucuii naíjmi'ica a'ñimej í mej Dios jetze me'ecan tí'ixaxa'ata'a, majta a'ñimej í mej r'í'i tí'iteseijre'eca'a í Dios jemi. Jee xaa ne'u, a'ñi pu huá'ucuii mat'ij mena'a pua'amé huácuihuaca'a íiyen chaanaca japua, tíj na'a jécua ímuá, ti ajta íjii.

19

A'ñi mú' tí'ichuúica júte'e u ta japua

¹ Netí'ijtá ni huá'unamuajri'i í mej ta japua ca'anín jín tí'ichuicaca'a. Cu xiee jeíhua huápi'i ajteáxiireca'a a'íime í mej tí'ichuicaca'a. Miyen tijín:

Aleluuya, tiché'e rí'i tiraatá'an í taDioj,
 a'iné a'íi pu ari tu'irájtuaa, a'íi pu jetze a'uvé'emej í
 tej jín rí'i tira'utasej,
 ajta a'íi pu a'íin pú'een í ti nain jín an-
 tiújmua'aree.

² Tzáahuati'lira'a pu jín huá'axijte'e,
 ajta ayén, tiraavíjete'e ti a'íin puajtzi
 hua'atá'aca.

A'íi pu ari ra'uxijte a'íjna í 'íita'a ti ve'ecán jín
 ti'itéveeca'a,

a'íjna í 'íita'a ti ruhuá'ira'a jín ramuá'itica'a í tu-
 min,

ti ajta ca'aníjra'a hua'utá'a a'ímej í mej án
 japon

huachéejme'ecaa án chaanaca japua mej mi
 a'ij pua'a huárini

me'íjna jime'e mej jamuan huateújxana'acire.

Dios pu ajta puajtzi raatá'a a'íjna jime'e

ti a'íin 'íita'a ayén huá'ucuii a'ímej í mej
 ravaire'e í Dios.

³ Majtahua'a mú huajíjhuaca'a miyen tijín:

—Aleluuya, jé'ecan pu jetzen ajcitziúuta a'ame
 tíj na'a rusén jime'e. —Ayee mú tiu'utaxájtaca'a.

⁴ Majta a'íime í vaujsi í mej seité japon muáacua
 ará'ase, majta í mej muáacua, í mej majta ru-
 uri, naíjmi'i mú aicaujtuuxi, mej mi raateánajche
 me'íjna í Dios í ti e'ecájca ipuari japua. Miyen tijín:

—Ché'e ayén teja'uré'enen. Aleluuya.

⁵ Tí'iquí seij huajíjhuaca'a ti a'uun a'utéveeca'a a'ájna vejli'i jetzen í mej japuan tí'imuai'ivajtaca. Ayen tijín:

Setá'aj rí'i tiraatá'an se'íjna í Dios,
naíjmi'i mú'een mi sej ravaire'e.

Capu amín a'ij, ti pua'a siyen vivejmé'en jín
títetateí
na'ari sej ciliéene'e jín títetateí.

Tí'ij huaténeiche í Cáne'a

⁶ Netí'ij ni neajtahua'a huá'unamuajri'i a'ímej. Cu xiee jeíhua huápi'i ajteáxiireca'a. Ajta, matí'ij tiu'utaxájtaca'a, ayée pu namuajre'eca'a tíj jaj ti tetej tzajta'a mí'ie. Ayee pu ajta namuajre'eca'a cumu mej téniuuca'an. Miyen tijín:

Aleluuya, tiché'e rí'i tiraatá'an í Dios,
a'iné pu'uri nain jín tí'aijta a'íjna í tavástara'a í ti
taDioj pú'een.

⁷ Tiché'e tiyen huatátatemua'ave'en,
teajta tiyen tiraatateújtzi'ire'en,
tej ti rí'i tiraatá'an

a'iné pu'uri a'ájna teja'uré'ene ti a'ín Cáne'a hu-
aténeiche.

Ajta a'ín íra'ara'an pu'uri rí'i huaújruu.

⁸ Ayee pu tiraatá'a ti tiu'uteújchejte'en
a'íjna jime'e í cǎxuri ti mesti, ti ajta naa 'een,
ti temastájye'i, ti caí a'atzu chueemua.

Ajta a'íjna í cǎxuri ti naa 'een, a'ii pu a'ín pú'een
a'ij mej meri huaríj a'íjna jime'e í ti xí'epi'in 'een í
Dios jemi. A'ij pu xaa jín ucaújchejte'esin.

⁹ Ajta í ti ta japua tí'ivaire'e, ayée pu tinaatá'ixaa
tijín:

—Patá'aj ra'utéeyu'uxa yee: “Rí'í pu tihua'utá'a a'ímej í ti Dios hua'utá'ínee mej tiú'ucua'ani jamuan a'íjna í Cáne'a a'íjna xicáara'an ti jetzen huaténeichi.”

Aj pu 'i ayén tinaatá'ixaa tijín:

—Ayen ti'ayajna í Dios jemi a'ij nej neuchén timuá'ixaa.

¹⁰ Jíme'en pu'u ayén tinaatá'ixaa, netí'ij ni aicántutzi a'u ti e'era'ícajme nej ni raateánajche. Ajta a'íin, ayée pu tinaatá'ixaa tijín:

—Capej hui piyen neruure a'iné nee nu niyen che'atá nena'a tí'ivaire'e í Dios jemi patíj mú'ee, majta a'íme í a'ihuáamua'a í mej miyen te'anxájta me'íjna jime'e a'ij ti tiu'utaxájtaca'a í Jesús, majta a'ij ti a'íin huaríj. Patá'aj pe'íjna huateánajche í Dios, a'iné a'íjna í niuucari ti jíme'en raxa a'ij ti tiu'utaxájtaca'a í Jesús, a'úu pu jetze a'uvé'emej í xiéjniu'ucari ti Dios jetzen me'ecan tí'ixaxa'a. —Ayee pu tiu'utaxájtaca'a a'íjna í ja'ati.

A'í pu avé'eca japuan í cahuaayu'u ti cuáinara'a

¹¹ Netí'ij ni raaseíj ti antacúuni'ihuaca'a u ta japua. Me'ecui xaa, cahuaayu'u pu án a'utéveeca'a. Naa pu tí'icuinara'a, ajta a'íin í ti japuan avé'eca, ayée mú ratamuá'amua tijín: “Í ti nain jín té'aste, ajta ti tzáahuatl'ira'a jín tí'ixaxa'a.” A'í pu x'epi'ín ayén ríci a'íjna jime'e ti huá'axijte'e í teite a'ij ti tiraavíjte'e. Ajta ayée pu che'atá na'a tí'ine'use'e.

¹² Yee pu seijre'e í jí'iseáara'an jetze tíj taij ti á'ataa. Jé'ecan pu utearújti'ihuajmee í curuun í mu'úura'an jetze. Ajta jetzen pu té'eyu'usí'í a'ij ti ántehuaa. Ajta, capu ja'ati yaú'ítie a'ij ti huataújmu'a, sino a'í pu'u na'a ruseíj yaú'ítie.

¹³ Ayee pu éene'e ti'itéchejca'a í cǎxuri ti títi'ij, ajta xúure'e raaméiri'ihuajme'ecaa. Ayee mú majta raatamuá'a tijín: “A'ijna í niuucari ti jíme'en raxa í Dios.”

¹⁴ Majta cujta'an huajú'ucaa a'íime í xantaaru'u mej ta japua é'eme'ecan. Ayee mú éene'e ti'itéchejca'a í cǎxuri, ti mesti, ti ajta naa 'een. Naa pu tí'icuaína, ajta naa tí'iseijre'eca'a í tihuá'acǎxu, ajta capu a'atzu tí'ichueemuavi'icaa. A'íí mú cujta'an huajú'ucaa í mé ta'avé'ete'ete a'íimej japua í cahuaayu'u mej cuaiína.

¹⁵ Ajta a'íin niúucare'ara'an, ayée pu huá'aruuren í teite tíj ja'ati ti'iti'itisíjcheca'a a'íjna jíme'e í chun. Ayee pu puaíjtzi tihua'utá'asin a'íimej í mej seij chuejra'a japua é'eme'ecan a'íjna jíme'e í runiuuca. Ca'anéeri pu jín tihua'uta'aíjte'esin. Ajta, huá'a japua pu rávajtzi tíj na'a í ti jín huápi'í niu'ucami'í í Dios, ti nain jín antiújmua'aree.

¹⁶ Jetzen í cǎxure'ara'an, ajta a'u ti ajtavé'e í chun, ayée pu té'eyu'usi'i a'ij mej ratamuá'amua tijín: “Hua'atajtuhuan a'íimej í tajtúhuaani, ajta, ti tihuá'ajte'e a'íimej í mej majta tí'ajta.”

¹⁷ Netí'ij ni ja'ati huaseíj ti tí'ivaire'e u ta japua. Anti'ímua pu a'utéveeca'a í xicaj jetze. Ca'anín pu jín hua'utajé matíj mena'a pua'améca í pina'ase í mej cǎcacaj, í mej majta rá'ara'ive u júte'e. Ayen tijín:

—Ííye'e xu'u hui, mú a'uvé'uju'un sej si siyen tiú'ucua'ani se'íjna jíme'e ti Dios ayén tejá'amuamin.

¹⁸ 'Sej si hui ráacua'ani se'íjna í huá'ahua'ira'a a'íimej í mej tí'ajta na'ari huá'ahua'ira'a

í hua'acapítan í xantaaru'u. Seajta siyen ráacua'ani huá'ahua'ira'a se'ímej í teteca í mej jeíhua rucacá'ane, seajta hui huá'ahua'ira'a í cahuaayu'u, seajta huá'ahua'ira'a se'ímej í mej avé'ete'ete. Nain xu hui cua'ani huá'ahua'ira'a í teteca, capu amín a'ij ti pua'a miyen ruxiéehua á'ujjhua'ane'en nusu mej ca'anéeri jín tí'imuari'eca'a. Capu amín a'ij ajta ti pua'a mej vivejmé'en títetateí nusu miyen ciliéene'e jín tí'ivaire'e. Mú'een xu xaa hui ráacua'ani í huá'ahua'ira'a. —Ayee pu tiu'utaxájtaca'a a'íjna ti ta japua tí'ivaire'e.

¹⁹ Net'íj ni hua'usej mej e'etiújseire'eca'a a'íjna í ja'ati ti huápi'i á'atesi'ire'e, majta a'íme í mej yen tí'ajta i chaanaca japua. Huá'a jamuan í ruxantaaru'ustemua'a, a'íí mú e'etiújseire'eca'a mej mi raaténe'usi'ite'en me'íjna í ti avé'eca í cahuaayu'u japua, majta me'ímej í xantaaru'ustemua'ame'en.

²⁰ Ajta a'íjna í ja'ati ti huápi'i á'atesi'ire'e, a'íí pu huatévi'iri'ihuaca'a a'íjna jamuan ti hua'itzi jín tí'ixaxa'ata'a a'íjna jetze me'ecan. Ajta, a'íjna í ti huápi'i á'atesi'ire'e, a'íí pu tiu'umuáriej í mej jín rí'i tíra'utasej. Ayee pu 'een jín huá'ucuanamua a'ímej í mej ra'ancuré'a me'íjna í mej huá'a jetze á'ayu'usi'i a'ij ti ántehuaa a'íjna í ja'ati. Majta raateánajcheca'a a'íjna í tí'ti ti ayén éene'e seire'e tíj a'íjna í ja'ati ti huápi'i á'atesi'ire'e. Mej jíme'en huavívi'iri'ihuaca'a a'ímej í mej hua'apua, matí'ij mi me'an huaje'etéehua'axi ruurica a'ájna já'ahua'a a'alaguun a'u ti azufre jín á'ataa.

²¹ Ajta, a'íjna ti cahuaayu'u japua avé'eca, a'íí pu ayén huá'aruu í seica í mej rá'astijre'eca'a me'íjna ti huápi'i á'atesi'ire'e. A'íí pu rusej huá'ucuii

a'íjna jime'e í runiuuca ti ayén tí'ivaire'e tíj chun ti 'aíjninei téne'etze'en. Majta naíjmi'í í pina'ase, a'íí mú huáju'uxai temua'a jeíhua me'íjna jime'e í huá'ahua'ira'a a'ímej í mej huácuihuaca'a.

20

Cirístu'u pu nu'u tiu'uta'aíjta seíj vi'ira'a nine'ira'a

¹ Netí'íj ni seíj huaseíj ti ta japua tí'ivaire'e. U júte'e pu ve'ecáme'ecaa. A'íí pu ajta yaavi huáchuisime'e a'íjna ti jín te'iteáanan a'u ti e'etécun ti caí a'íj ámitieere'e a'achú ti a'ucátee. A'íí pu ajta huapíjsime'e ti'iti cadeena, ti vivéj.

² Aj pu 'i raatéevi'í a'íjna í cu'ucu'u, a'íjna ti jécua ímuá huataseíjre. A'íí pu a'íín pú'een í ti ayén ántehuaa tíjín tiyaaru'u, ajta Satanás. Aj pu 'i ra'íjtápe ti íj á'ateevi'in a'achú cumu seíj vi'ira'a nine'ira'a.

³ Aj pu 'i a'uun ya'ucájríe a'u ti e'etécun. Ajta ra'íteána. Ti'iti pu ajta ancáavi'íjte tí'íj caí ché'e huá'acuanamua a'ímej í mej seíj chuéjra'a japua é'eme'ecan ajta na'a caí te'entipué'ajte'en seíj vi'ira'a nine'ira'a. Aj pu 'i xaa, ayén tiú'ujxe'eve'e mej rá'íjxíjta tí'íj a'atzu á'ateevi'in ti ruxiéehua á'uche'ecane'en.

⁴ Net'í'íj ni ípuari tiu'uséíj, neajta ne'ímej í mej jetzen acáte'ete'e. A'íí mú a'íín pú'een í mej ra'ancuré'a mej me'íjna jín antiújmua'areere mej hua'uxíjte'en í teite. Neajta á'iyen huá'axiejniu'uca huaseíj a'ímej í mej huá'íjveichixí í hua'amu'úu jetze me'íjna jime'e mej tiu'utaxájtaca'a me'íjna jetze me'ecan í Jesús,

majta me'íjna jime'e mej rá'astijre'eca'a me'íjna í niuucari ti jíme'en raxa í Dios.

Majta a'íime, camu raateánajcheca'a me'íjna í ja'ati ti huápi'i á'atesi'ire'e, camu majta raateánajcheca'a í ti ravaire'e. Camu majta ra'ancuré'a í ti té'eyu'usi'ihuaca'a í huá'acuaatze'e nusu í huá'amujca'a jetze a'ij ti ye'í ántehuaa a'íjna í ja'ati ti huápi'i á'atesi'ire'e. A'í mú majta huatarúj jamuan í Cirístu'u, majta me'íjna jín ti'itevéé muá'araa matíj tajtúhuaani tíj na'a seíj vi'ira'a nine'ira'a jime'e.

⁵ A'ii mú a'ín pírici í mej amuacaí huatarújsin í mej meri huácuii. Majta í seica, í mej meri huácuii, camu miyen majtáhua'a huatarúj ajta na'a caí te'entipúa'are seíj vi'ira'a nine'ira'a.

⁶ R'í pu tiraatá'a í ja'ati ti ayén tí'ijci'iti, ti ajta huatarújsin huá'a jamuan í mej anáaté'ee aitaju'un huá'a tzajta'a í mi'ichite. R'í pu tiraatá'a a'iné Dios pu ari huateúra'ate í ru jemi a'íjna í ja'ati. Capu ajta ch'é e ri'iríista a'ame ti ajtahua'a huámi'ini tíj na'a rusén jime'e, sino ayée pu a'íjna jín te'enteáruti tí'ij ti'iti jín tí'ivaire'e í Dios jemi, ajta jemin í Cirístu'u. A'í pu jamuan tiu'uta'ájta. Ayee pu a'ateevi'i a'achú seíj vi'ira'a nine'ira'a.

Dios pu ra'antimú'iti í tiyaaru'u

⁷ Tí'ij te'entipúa'are í seíj vi'ira'a nine'ira'a, aj pu 'i ayén huatátuihua a'íjna í Satanás a'ujna a'u ti aiteánami'ihuaca'a.

⁸ Tí'iquí a'itaméj tí'ij huá'ucuanamuan a'ímej í mej seíj chuéjra'a japua é'eme'ecan, matíj mena'a pua'amé yen seijre'e íiyen chaanaca japua, tíj na'a Teijmata'a pújme'en, ajta Huáahuata pújme'en,

ajta Cuameche, ajta Tzareeme'en. A'ímej pu tíseire'esin í mej miyen huataújmua'a tǐjín Gog, ajta a'ímej í seica í mej miyen huataújmua'a tǐjín Magog. Ayee mú ará'ase a'achú ti caj tí'itiej í sej ti huaca a'utí e'eve'e'ástime í jaj ti ve'ée. Ajta a'ín í cu'ucu'u huá'ajseire'esin mej mi huaténe'use'en.

⁹ Mat'íj mi nain japua á'ujujhua'ane'e tǐj na'a ti auuyaúj í chuej japua. Mat'íj mi rajnáj a'u mej te'uté'inaamuaca'a a'íme í mej rǐ'í tí'iteseijre'e í Dios jemi, majta rajnáj me'íjna í chajta'a ti huápi'i hua'aráanajche a'ímej í mej teitestemua'ame'en pú'een í Dios. Ajta, taij pu u e'icájve u ta japua. Ajta hua'uteátaj a'ímej í mej jamuan á'ujujhua'ane'e í tiyaaru'u.

¹⁰ Ajta a'ín í tiyaaru'u ti huá'ucuanamua, a'úu pu e'eteárii huaca'a a'utí a'alaguun a'u ti azufre jín á'ataa, a'u ti ajta é'eseijre'e a'íjna í ja'ati ti huápi'i á'atesi'ire'e, ajta a'íjna ti ravaire'eca'a, a'íjna ti hua'itzi jín tí'ixaxa'ata'a a'íjna jetze me'ecan ti huápi'i á'atesi'ire'e. A'uu mú mi rajpuaítzi muá'aju'u nain xicaj tzajta'a, ajta nain tíca'ari tzajta'a tǐj na'a rusén jime'e.

Dios pu huá'axijte'e a'utí é'eseijre'e í ipuari ti ve'ée

¹¹ Net'íj ni ipuari huasej ti ve'ée. Naa pu tí'icuinara'a. Neajta ne'íjna huasej í ti acájca. Ajta í chaanaca, ajta a'íjna í ta japua, é'e huaújpua'arixi me'íjna jemi. Camu ché'e mé'e jé'eseijre'eca'a.

¹² Net'íj ni ne'ímej huasej í mej meri huácuii, í mej vivejme'en jín títetaté'eca'a, majta í mej ciliéene'e jín tí'ivaire'eca'a. A'uu mú e'eré'eveeca'a me'íjna jemi í ipuari. Majta seica ra'utácuuraca'a

í yu'uxari. Majta seij autácuuraca'a í yu'uxari ti jetzen té'eyu'usi'a a'ij mej ántea'arua í mej miyen ruuri huateáturaasin í Dios jemi. Dios pu ajta hua'uxíjte a'ímej í mej meri huácuii me'íjna jime'e a'ij ti té'eyu'usi'ihuaca'a í yu'uxari jetze, í ti jetzen ayén té'axa a'ij mej huaríj matí'ij mauj ruurica'a, seij ajta seij.

¹³ Matíj mena'a pua'amé í mej aujámí í jaj tza-jta'a, a'íí mú huatarúj. Majta í seica, í mej huácuii a'utí na'a, capu amín tí'ti pírici í ti huá'ucuii na'ari a'utí a'uteájturaa í huá'axiejniu'uca, naíjmi'í mú majtáhua'a huatarúj. Ajta Dios pu naíjmi'ica a'uxíjte a'íjna jime'e a'ij mej titetiújcha'íca'a matí'ij mauj ruurica'a.

¹⁴ Jíme'en pu'u hua'uxíjte, a'íí pu ra'upuá'ajte naíjmi'ica ti tí'itecui'ica, ajta a'ujna a'u mej a'uteájturaa í mej meri huácuii, í ti ayén téja'arájtehuuaa tíjín Hades. Naíjmi'ica pu atéehua'axi a'ujna jetze í a'alaguun ti azufre jín á'ataa. A'ii pu a'íín pú'een í mej hua'apuaca jetze huácui'ini, mej me'uun a'uteáturaasin a'ujna jetze í a'alaguun ti azufre jín á'ataa.

¹⁵ Tí pua'a caí ayén té'eyu'usi'ihuacajche'e a'ij ti seij ántehuaa a'íjna jetze í yu'uxari ti jetzen té'eyu'usi'ihuaca'a a'ij mej ántea'arua a'íime í mej ruuri huateáturaasin í Dios jemi, ayé pu tí'ijruuren a'íjna í ja'ati ti caí é'eyu'usi'ihuaca'a. Dios pu ra'atéjisin a'ujna jetze í a'alaguun ti azufre jín á'ataa.

21

Dios pu rajéjcuare'e ta japua ti seijre'e, ajta í chaanaca ti yen seijre'e

1 Netí'ij ni raaseíj á júte'e ti ari jéjcuacan jín seijre'e. Ajta í chaanaca, ayée pu che'atá na'a jéjcuacan jín seijre'e. Ajta á júte'e ti mí'ime'ecan, ajta í chaanaca ti mí'ime'ecan, capu ché'e mé'e jé'eseijre'eca'a. Ajta í jaj ti ve'ée, capu ajta ché'e seijre'eca'a, a'iné naíjmi'i pu e'ehuaújpua'arixi.

2 Netí'ij ni raaseíj ti á ve'ecáme'ecaa á júte'e a'u ti Dios é'eseijre'e a'íjna í chajta'a ti Dios hu-ateúra'ate. Ayee pu téja'arájtehuaa tijín Jerusalén ti jéjcu. Ayee pu huaújruu a'íjna í chajta'a tíj ajta 'íta'a rí'i tiu'uteújchejte tí'ij ari huatéviche'esin.

3 Netí'ij ni ráanamujri'i ti ca'anín jín tiu'utaxájtaca'a í ja'ati ti a'uun a'utéveeca'a jemin í ipuari. Ayee pu tiu'utaxájtaca'a tijín:

—Xaaseíj, mú'een, a'iné pu'uri hui huataseíjre'esin huá'a jemi í teteca a'íjna í chí'lira'an í Dios. A'íi pu huateáturaasin huá'a jemi, majta a'íime, a'íi mú teitejra'an pú'een'e muá'aju'u. Ajta í Dios, a'íi pu ruseíj seíire'e a'ame huá'a jemi.

4 'Rí'i pu hui tihua'utá'asin mej mi caí ché'e tí'itij jín ruxiéemiste'e. Camu ché'e cui'ini. Camu ché'e me'íjna jín ruxiéemiste'e muá'aju'u me'íjna jime'e ti seij huamí'i. Camu majta ché'e ruyeine muá'aju'u; camu ché'e miyen tirajpuaítzi muá'aju'u me'íjna jime'e ti tí'iti huá'acucuí'i, a'iné a'íjna í ti mí'ime'ecan, a'íi pu ari e'ehuaújpua'arixi. —Ayee pu tiu'utaxájtaca'a a'íjna í ja'ati.

5 Ajta a'ín í ti ipuari jetze acájca, ayée pu tiu'utaxájtaca'a tijín:

—Me'ecui xaa, naíjmi'i í ti tí'iseijre'e, nee nu hui rajéjcuare'e.

Ajta ayén tijín:

—Autéeyu'uxa a'íjna, a'iné nee nu tzáahuati'ira'a jín tí'ixaxa'a ne'íjna jime'e ti ayén ti'ayajna.

⁶ Aj pu 'i ayén tinaatá'ixaa tijín:

—Pu'uri icu. Antipué'areca'a. Nee nu hui ne'ín pú'een i nej amuájca, neajta i nej uvé'eteajti. Nee nu jéjcuá imuá huataseíjre, neajta nain nu tiú'utaahuaca'a ti yen tí'iseijre'e. Neajta nu nain jín ranaíjmire'e tij na'a ti ajta tí'iseijre'e. A'ati ti na'a ti neetzi jemi á'ujca'anen nej ni niyen tiraatá'an í ti tirá'aturaate'e í tzajta'an, huáapua'a nu tiraatá'asin ne'íjna í jaj ti a'uun eiráninei a'u ti e'ejajxa. Nee nu xaa jaj raatá'asin í ti jín ruuri a'ame tij na'a rusén jime'e.

⁷ 'Ajta, a'ín ti tiu'utéemua'iti, ayée pu tí'ijci'iti. Nee nu Diojra'an pú'een'e a'ame, ajta a'ín, niyauj pu pú'een'e a'ame.

⁸ 'Majta a'íime matíj mena'a pua'amé mej a'ij pua'a titetiújcha'íi neetzi jemi, ayée pu tihúa'aci'iti mej me'uun a'uteáturan a'alaguun ti azufre jín á'ataa. A'ii pu a'ín pú'een í mej jín hua'apuaca jetze huácui'ini. A'uu mú a'uteáturaasin a'íime í mej caí á'ujca'ane mej rajpuaíjtzi neetzi jetze me'ecan, majta a'íime í mej caí té'atzaahuate'e, majta a'íime í mej huá'anahua'aca naíjmi'ica, í tí'iríi, mé 'uuca, majta mé teteca. Majta seica me'uun a'uteáturaasin. A'ii mú a'ín pú'een í mej tí'itecui'ica, majta í mej ruxána'acire'e, majta í mej tí'ichahuaara, majta a'íime í mej rana'amiche me'íjna í ti caí Dios pú'een, majta matíj mena'a pua'amé tí'ihua'itaca. Matíj mena'a pua'amé

mej miyen 'een, a'úu mú a'uteáturaasin a'alaguun.
—Ayee pu tiu'utaxájtaca'a a'íjna í Dios.

Jerusalén ti jéjcuá

⁹ Aj pu 'i, seij pu á e'iré'ene ineetzi jemi. A'ii pu a'íjn pú'eene'e seij ti ta japua tí'ivaire'e ti huá'a jetze ajtème'ecan í mej aráhua'apua ará'ase, í mej ru'itetú'utujme'ecaa í cutzape'e ti ajta aráhua'apua ará'ase. Ajta a'íjna tzajta'a í cutzape'e, a'íi pu urámuaaca'a seij ajta seij í cu'ini'ira'a í mej jín rajpuaíjtzica'a í teite í mej yen seijre'eca'a japuan i chaanaca, í ti ajta aráhua'apua ará'ase. Ayee pu tinaatá'ixaa tijín:

—Iiya'a jíi, nee nu hui timuaatasejrate'esin ne'íjna í ti jemin te'ataújratziiri'i í Cáne'a ti íra'ara'an pú'eene'e a'ame.

¹⁰ Jíme'en pu'u ayén tinaatá'ixaa, aj pu 'i a'íjn xiéjniu'ucare'ara'an í Dios huateájturaa ineetzi jemi. Aj pu 'i a'uun neja'uví'iti a'u ti jirí a'utacá'a, ti huápi'i ájtee, ti ajta ve'etí á a'utacá'a. Aj pu 'i tinaatasejrate a'íjna í chajta'a í Dios ti huateúra'ate ti ayén téja'arájtehuaa tijín Jerusalén. A'uu pu u ta japua e'icáme'eca'a a'ujna ti Dios é'eseijre'e.

¹¹ Naa pu ti'itemastájye'icaa tíj ajta Dios huápi'i naa seijre'e. Ajta a'íjna í ti temastájye'icaa, ayée pu seijre'eca'a tíj tetej ti huápi'i tí'ijnajche, ti ajta naa tí'itatjaz tíj a'íjna í cristal. Ayee pu ajta seijre'eca'a tíj a'íjna í jaspe.

¹² Jaxu'u pu jín tiré'anami'i a'úu ti ve'etí a'utacá'a, ti temua'a té'ejtee. Tamuáamuata'a japuan hua'apua pu ará'axcaa a'u ti é'epueerta. Majta a'íime í mej majta tamuáamuata'a japuan hua'apua ará'ase a'íime í mej ta japua tí'ivaire'e,

a'úu mú a'ité'u'upu'ujme'ecaa a'u ti é'epueertajme seij ajta seij. Ajta, í puéerta jetze, seij jetze ajta seij, ayée pu té'eyu'usi'ihuaca'a a'ij mej ánte'arua a'íime í teitestemua'ame'en í mej huá'a jetze airaújnejjte a'ímej jetze í yaújmu'a'ame'en a'íjna í Israél teecan.

13 U Teijmata'a pújme'en, huaicacíe pu é'epueerta, ajta Tzareeme'en pújme'en, ajta huaicacíe pu ajta é'epueerta. Ayee pu che'atá na'a, huaicacíe tá'apueerta ajta u Cuameche pújme'en, ajta u Huáahuata pújme'en huaicacíe pu ajta é'epueerta.

14 Ajta tamuáamuata'a japuan hua'apua pu te'ará'ase í ti tajé'este í ti ajta japuan ájtaavijhuaca'a í jaxu'u ti jín curé'anami'ihuaca'a í chajta'a. Ajta a'íjna jetze í ti tajé'este, ayée pu té'eyu'usi'i a'ij mej ánte'arua a'íime í mej majta tamuáamuata'a japuan hua'apua ará'ase, í ti ajta Cáne'a hua'antíhuau mej mi me'ín tejá'uxajtane'en me'íjna jetze me'ecan.

15 Ajta a'ín ti tí'ine'ixaate'eca'a, a'íi pu ti'iti huitéhueeca'a cumu ti'iti cíyej ti oro jín taavíjhuaca'a. A'ii pu a'ín pú'eene'e ti jín raaté'itien a'achú ti auuyaúj í chajta'a, ajta a'achú ti antayaúj í puéerta, ajta a'achú ti ájtee í jaxu'u.

16 Ruxí'ej pu huatatí'tí'ijmee. Ayee pu che'atá naa huatátee tíj ajta auuyaúj. Ajta a'ín raaté'itíee í chajta'a a'íjna jíme'e í cíyej. Ayee pu huatátee í chajta'a a'achú cumu hua'apua vi'ira'a kilómetros. Ayee pu che'atá na'a auuyaúj; ayée pu che'atá na'a ájtee.

17 A'íi pu ajta raaté'itíee a'íjna í jaxu'u. Ayee pu che'atá na'a tiraaté'itíe matíj tí'ijri'ire í teteca.

Ayee pu ájtee a'achú cumu huaícate japuan anxívi meetro.

18 Ajta í jaxu'u, tetej pu jín ájtaavijhuaca'a mej miyen ratamuá'amua tijín jaspe. Ajta a'íin í chajta'a, nain pu jín taavíjhuaca'a a'íjna jime'e í oro ti naa té'ajtaave'e tíj í viidrio.

19 Ajta a'íjna í ti tajé'este, ti ajta japuan ájtaavijhuaca'a a'íjna í jaxu'u í ti jín curé'anamili í chajta'a, naa pu rí'i tí'irúurijhuaca'a tíj na'a ti é'eseijre'e a'íjna jime'e í tetej ti huápi'i tí'ijnajche. A'íjna ti seij, a'íin pú'een'e'e í jaspe. Ajta í ti hua'apua, zafiro pu píríci. Ajta í ti huaíca, a'íi pu pú'een'e'e a'íjna í ágata ti síichira'a. Ajta í ti muáacua, a'íi pu píríci í esmeralda, ti rú'aarara'a.

20 Ajta í ta'anxívi, a'ii pu a'íin pú'een a'íjna í ónice ti yú'uxare'e. Ajta í ta'arájsevi, a'íi pu píríci a'íjna í cornalina ti í'ípa'u. Ajta í seij, í ti aráhua'apua, crisólito pu píríci ti teuúmuara'a. Ajta í seij, í ta'aráhuaica, berilo pu píríci ti rú'aarara'a seijre'e, í ti ajta cáj caj tí'iteuumuara'a. Ajta í ti aramuáacua, a'íi pu píríci í topacio ti naa tí'iteuumuara'a, ti ajta naa tí'itatjaz. Ajta í seica, ayée pu tí'een. Í ti tamuáamuata'a, a'íi pu píríci í crisoprasa ti naa tí'iteuumuara'a, ti ajta cáj tí'iru'aarara'a. Ajta í ti tamuáamuata'a japuan seij, jacinto pu pú'een ti taijravi'in jín nacamua. Ajta a'íin ti tamuáamuata'a japuan hua'apua ará'ase, a'ii pu a'íin pú'een'e'e a'íjna í amatista ti naa tí'ijámua'ara.

21 Ajta a'íjna í puéerta ti tamuáamuata'a japuan hua'apua ará'ase, a'íi pu jín taavíjhuaca'a a'íjna jime'e í perla, seij ajta seij í puéerta, seij jime'e í perla. Ajta í caaye jetze, nain pu oro jín

taavíjhuaca'a ti ajta ayén naa tí'itatzaj tǵj a'íjna í viidrio.

²² Neajta nu niyen raaseíj ti caí teyuu mé'e é'ehua'acaa a'ujna chajta'a a'iné a'u ti na'a a'ujna chajta'a miyen rana'amiche me'íjna í tavástar'a, í Dios, a'íjn ti nain jín antiújmua'aree, majta me'íjna í Cáne'a.

²³ Capu ajta ruxe'eve'e ti a'íjn xicaj hua'atátzavi'ira tújca'ari tzajta'a huá'a japua í teite. Capu ajta ruxe'eve'e ti a'íjn máxcira'i tátzave'e tíca'ari tzajta'a, a'iné a'íjna í ti Dios jín ruseíj temastájye'i, a'ii pu a'íjn pú'een ti hua'atátzavi'ira huá'a japua. Ajta, a'íjna í Cáne'a, a'ii pu a'íjn pú'een í tatzari ti huá'a jemi huatátza.

²⁴ Ajta a'íjna ti hua'atátza huá'a japua í mej me'uun huachéjme chajta'a, a'íi pu hua'atátzavi'ira a'ame huá'a japua a'ímej í mej seij chuéjra'a japua é'eme'ecan.

Majta a'íime í mej tihuá'aijte'e a'ímej í mej yen huachéjme i chaanaca japua, a'úu mú a'uvé'uju'u muá'aju'u u chajta'a mej mi r'íi tiraateájtuaani í Dios nain jime'e í mej jín rutémua'ave'e, majta nain jín mej tí'ijcha'íi ti jeíhua huápi'i tí'ijnajche.

²⁵ Camu ja'anáj te'iteánajsin tújca'ari tzajta'a a'u ti é'epueerta a'ujna chajta'a. Capu ajta ja'anáj huatética'ari a'ujna.

²⁶ A'uu mú ye'ará'asin í mej ve'ecán jín títetateí, ajta í ti jeíhua huápi'i tí'ijnajche, ti ajta naa tí'iseijre'e. Ayee mú raruuren matíj mena'a pua'amé seij chuéjra'a japua mej é'eme'ecan.

²⁷ Capu r'íri'ista a'ame ti tí'iti ti xána'aví'ire'e pú'een a'uun a'uteáuran a'ujna chajta'a. Capu ajta hua'atá'acare'en mej mi me'uun a'uteároute

a'ñime í mej a'ij pua'a ti'itiújcha'ñi na'ari a'ñime í mej tí'ihua'itaca sino a'ñime mu'u me'uun a'uteáruti í mej jíme'en ayén té'eyu'usi'i a'ij mej ánte'arua a'ijna jetze í yu'uxari í mej miyen ruurican hu-ateáturan me'ijna jemi í Cáne'a.

22

Jíme'en í játe'ana, ajta í ciyej ti a'uun é'esejre'e

¹ Aj pu 'i tinaatasejrate a'ijna í játe'ana ti jetzen 'airáanej a'u ti a'utéjvee í ipuari ti jetzen acájca í Dios, ajta a'ijna í Cáne'a. Ajta a'ijna í jaj ti mi'iyee, temua'a pu naa tiú'ujmua'ati. Naa pu ajta tí'itatjazaj t'ij í cristal. A'ii pu a'ñin pú'een í jaj í ti caí ja'anáj ateáxi'isin.

² Já'ita'a pu mi'iyee í caaye jetze ti a'uun a'utané'ni í chajta'a jetze.

Ajta, ciyej atavéejme'ecaa a'utí e'eve'e'ástime í jaj, seica a'u ti pújme'en, ajta seica u jetze pújme'en. A'ii pu a'ñin pú'een a'ijna í ciyej í mej jín ruuri muá'ara'ani. Tamuáamuata'a japuan hua'apua pu ará'ase í ti jín taaca t'ij na'a seij máxcira'i jetze p'tí'irijca, aj pu 'ij ajta seica jín taca'an a'ijna í ciyej. Ajta í xamua'ira'an, ayée pu tí'ivaire'e mej mi me'ijna jín huaújrujte'en a'ñime í mej seij chuéjra'a japua é'eme'ecan.

³ Capu ché'e a'uun séire'e a'ame í ti'iti ti Dios ayén tiraaxi'epi'intare ti ayén puaíjtzí tiraatá'an sino a'úu mú a'ujté'e muá'aju'u í Dios jamuan, majta a'ñime í mej me'uun huachéjme me'újna chajta'a jamuan a'ijna í Cáne'a. A'ñi mú tiu'uta'aíjta, majta a'ñime í mej tí'ivaire'e, a'ñi mú raná'amiche'e muá'aju'u.

⁴ A'íí mú jemin seíire'e muá'aju'u, ajta aj pu e'eseíire'e a'ame aj huá'acuaatze'e a'ij ti ántehuaa a'íjna.

⁵ Capu ché'e ja'anáj huatética'ari a'ujna. Capu ché'e ruxe'eve'e a'ame mej miyen tatzari jín hu-ateújtatzavi'i na'ari ayén ti hua'utétatzavi'in í xicaj, a'iné a'íí pu tavástar'a ti ajta Dios pú'een, a'íí pu hua'atátzavi'ira a'ame. Majta a'íime, a'íí mú tí'aíta muá'aju'u tíj na'a rusén jime'e.

T'íj uv'éenen í Círístu'u

⁶ Aj pu 'i ayén tinaatá'ixaa tíjín:

—Ayee pu hui ti'ayajna a'ij nej tí'imua'ixaate'e a'iné tzáahuati'ira'a nu jín ti'ixa. Ajta a'íin tavástar'a, a'íjna ti u ya'uta'íteca'a í ruxéjniu'uca tí'ij huá'a jemi huateáuran a'ímej í mej Dios jetze me'ecan tí'ixaxa'ata'a, a'íí pu ari naata'íteca'a i nej ta japua tí'ivaire'e nej ni tihua'utaseíjrate'en a'ímej í mej ravaire'e í Dios a'ij ti tiú'ujxe'eve'e ti ca'anacan ayén teja'uré'enen.

⁷ —Me'ecui xaa, nee nu hui mú a'uvé'emé'e na'ame.

Rí'i pu tiraatá'aca a'íjna ti ayén araúrasten a'ij ti té'eyu'usi'i a'íjna i yu'uxari jetze.

⁸ Neajta inee, i nej i'í Juan, nee nu ne'ín pú'een nej ráanamujri'i, neajta nej raaseíj a'ij ti té'eyu'usi'i a'íjna jetze i yu'uxari. Jíme'en nu'u niyen tiráanamujri'i, neajta tiu'uséij, aj nu ni niyen aicántutzi a'u ti e'era'íicajme a'íjna í ti ta japua tí'ivaire'e, ti ajta tinaataseíjrate nej ni raateánajche. Aj nu ni raatenáachejche'en nicu.

⁹ Ajta a'íin, ayée pu tinaatá'ixaa tíjín:

—Capej hui piyen neruure, mú'ee, a'iné ayée nu che'atá nena'a tí'ivaire'e í Dios jemi patíj mú'ee, ajta matíj majta a'íime í a'ihuáamua'a í mej Dios jetze me'ecan tí'ixaxa'ata'a, majta matíj mena'a pua'amé araúraste a'ij ti té'eyu'usi'i a'íjna jetze i yu'uxari. Patá'aj pe'íjna huateánajche í Dios.

¹⁰ Aj pu 'i ayén tinaatá'ixaa tíjín:

—Capej hui rá'avaata í niuucari ti a'íjna jetze á'ayu'usi'i i yu'uxari, ti ajta Dios jetze me'ecan tí'ixa, a'iné pu'uri tén a'ájna teja'uré'enejsin a'ájna xicáara'an jetze tí'ij naíjmi'i te'entipúa'ari.

¹¹ 'Ajta í ti hui a'ij pua'a ti'itiújcha'íi, ché'e auj ayén a'ij pua'a ti'itiújcha'íi. Ajta í ti xána'avi'ire'e, ché'e auj xána'avisí'i seijre'e. Ajta í ti rí'éene'ecán jín seijre'e í Dios jemi, ché'e auj ayén rí'í ti'iseíre'e á'ara'ani.

¹² 'íMe'ecui xaa! Nee nu hui ca'anacan mú a'uvé'emé'e na'ame nej ni hua'utá'an a'ij ti tiraamuá'itín, nej ni niyen tihua'utá'an matíj mena'a pua'amé í mej tiraamuá'iti, seij ajta seij, a'ij ti tiraavíjte'e.

¹³ 'Nee nu ne'ín pú'een i ta'amuájca, neajta i nej tu'uvé'eteajti, neajta ne'ín pú'een i nej jéjcuá imuá huataseíjre, neajta ne'ín pú'een i nej yen seíre'e na'ame tíj na'a rusén jime'e. Nee nu neajta ne'ín pú'een i nej nejmí'i huataseíjre tí'ij caí xi ti'íti mé'e seijre'eca'a, neajta nu ne'ín pú'een i nej nain ancuré'asin tí'ij te'entipúa'ari tíj na'a ti íjii tí'iseijre'e.

¹⁴ Rí'í pu tihua'atá'aca a'ímej í mej tí'ija'usica í tiú'ujcixi tí'ij ayén tihua'uci'íti mej me'íjna jetze ráacua'ani í cíyey í mej jín ruuri huateá'uran, mej mi majta me'uun a'uteárute me'újna chajta'a me'íjna jetze a'u ti é'epueerta.

15 Ajta á pua'acivé, a'úu mú a'uté'uu muá'aju'un a'íime í mej a'ij pua'a titetiújcha'íi, majta a'íime í mej tí'ichahuaara, majta a'íime í mej ruxána'acire'e. A'íi mú majta á pua'acivé a'uté'uu muá'aju'un a'íime í mej tí'itecu'lica, majta í mej rana'amiche í ti caí Dios pú'een, majta matíj mena'a pua'amé í ti ayén tihua'aráanajche ti hua'itzi pú'een, majta í mej tí'ihua'itaca.

Jesús pu te'anxájta

16 —Inee, i nej Jesús pú'een, nee nu u ya'uta'íteca'a mú'ejmi jemi ne'íjna ti nevaire'e tí'ij a'íin te'anxájta huá'a jemi a'íimej í mej me'uun e'etiújse'iri mej mi raateánajche í Dios. Nee nu ne'íjna jetze huanéj í David teecan. Nee nu huáacixa'ara'an pú'een a'íjna í David.

A'íin ti huatéeviche raatá'ineesin ti uvé'enen

17 Ajta a'íin xiéjniu'ucare'ara'an í Dios, ajta a'íin ti auchén huatéeviche, ayée mú ti'ixa tíjín:

—Ché'e mú a'uvé'eme'en.

Ajta í ti ranamua, ché'e ajta a'íin ayén tiu'utaxáj yee:

—Ché'e a'íin mú a'uvé'eme'en.

Ajta í ti jetzen á'ujca'ane ti ayén tira'ará'astijre'en, ché'e ja'ati ti na'a ayén mú a'uvé'eme'en, ché'e ajta huáapua'a ra'ancuré'an í jaj ti jín ruuri huateáturan.

A'íi pu taatájevi í Jesús

18 Ayee nu niyen tihua'a'íjcate'e ja'ati ti na'a ti ranamua a'ij ti té'eyu'usi'i a'íjna i yu'uxari jetze ti Dios jetze me'ecan ti'ixa, ti pua'a ja'ati ayén seicié tiu'utaxáj, Dios pu puaíjtzi raatá'asin a'ij ti té'eyu'usi'i a'íjna jetze i yu'uxari.

19 Ajta ti pua'a ja'ati ra'uré'uuna í ti'iti ti a'íjna jetze té'eyu'usi'i ti Dios jetze me'ecan ti'ixa, Dios pu ajta rá'ari'ira a'íjna t'íij caí ché'e ráaci'iti ti a'íjn a'íjna jetze ráacua'ani a'íjna í ciyej ti jín ruuri á'ara'ani. Capu ajta ché'e ayén tí'ijci'iti ti a'íjn a'uun a'uteároute í chajta'a jetze a'u ti Dios hu-ateúra'ate. Ayej té'eyu'usi'i a'íjna i yu'uxari jetze.

Juan pu ayén te'evé'eniuuve

20 Neajta inee, i nej te'anxájta ne'íjna jime'e, ayée nu ti'ixa ne'íjna jime'e ti ayén ti'ayajna nej ca'anacan mú a'uvé'emé'e na'ame.

Ché'e ayén teja'uré'enen, patá'aj yé uvé'enen, tavástara'a, mi pej Jesús pú'een.

21 Ché'e a'íjn tavástara'a ti ajta Jesús pú'een, ché'e a'íjn r'íi tihua'utá'an a'ímej í mej teitestemua'ame'en pú'een í Dios. Ché'e ayén teja'uré'enen. Aye pu te'entipúa'areca'a í niúucare'ara'an í tavástara'a.

**I niuucari ti jejcua, ti ajta jime'en ra'axa
a'ijna i tavastara'a, i Ciriistu'u ti ji'i Jesús ti
tu'irájtuaa**

**New Testament in Cora, El Nayar Presidio De Los
Reyes; crn (MX:crn:Cora, El Nayar)**

copyright © 2008 Wycliffe Bible Translators, Inc.

Language: Cora, El Nayar

Translation by: Wycliffe Bible Translators, Inc.

Cora, Presidio de los Reyes [crn], Mexico

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cora, El Nayar

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

10f6cd13-ea38-5c62-beee-25cf942ce3aa